

重編歙邑棠樾鮑氏三族宗譜

遷族
全載

卷八十九
八十九




棠樾鮑氏三族宗譜卷之一百八十三 墓圖列後

西沙溪宋
始祖
榮公墓圖

做李伯時

圖



宋文學始祖榮公公墓

坐落二十三都十畝西沙溪地方

女字捌百伍拾伍號

土名上沙溪

田肆分捌釐伍毫

女字捌百陸拾玖號

土名沙溪墳

地柒分壹釐壹毫

女字捌百柒拾號

土名上沙溪

田伍分貳釐陸毫


女字捌百柒拾捌號

土名上沙溪


地叁分伍釐陸毫

以上係在墳田地其祀產在他處者另簿紀載

年大趙傲



掌書園宋始
祖妣榮孺人
墓圖



宋始祖妣榮孺人墓

坐落二十二都九畝棠樾掌書園地方

四字壹千玖百陸拾壹號 土名掌書園


地叁分柒釐陸毫

伍絲

祀產在他處者另簿紀載

富亭山鑄公
玠公墓圖

法惠崇



宋鑄公塋墓

附塋

宋明經玠公 瓘公合塋墓

坐落二十二都九畝棠樾富亭山地方

四字叁百肆號 土名富亭山墳 山地叁畝伍分捌毫

以上係墳山地祀產不悉載

濕坑鑄孺人墓

迂倪傲



宋鑄公元配孺人王氏塋墓燕窠形

坐落二十二都二畝濕坑地方

原行字九百九十二號山地一畝一角十五步居美公分下子孫均稅山一角居安公分下子孫均稅山地若干蜀源居仁公子孫均稅

今改及字壹千玖百陸拾陸號

土名 濕坑鮑家墓

地壹畝

及字壹千玖百陸拾柒號

土名全

山壹千叁拾步

及字壹千玖百玖拾陸號

土名全

山壹畝壹分玖釐伍毫伍絲

及字壹千玖百柒拾玖號


土名全

地貳分捌釐伍毫柒絲肆忽


以上山地稅分入各族分下輸糧其取租載入祀田簿內茲不

悉錄

古希李倣



鴻鶴林孺人墓圖



宋玠公孺人江氏墓


坐落二十二都三畝蜀源鴻鶴林地方

萬字叁千陸百貳拾玖號 土名鴻鶴林 山玖分玖釐柒毫


又 土名仝 地壹畝柒分捌釐柒毫

以上係墳山地祀產不悉載

武林居美公墓圖



徽李昭筆



宋居美公暨孺人程氏合葬墓

坐落十九都武林地方

率字壹千柒百拾捌號

土名

地貳百

陸拾陸步壹分柒釐伍毫

率字壹千柒百貳拾壹號

地陸百壹拾

肆步伍分柒釐

率字壹千柒百貳拾貳號

地柒步貳分

率字壹千柒百貳拾叁號

地貳拾步

率字壹千柒百貳拾肆號

地壹百捌拾



叁步貳分伍釐

坐字貳百壹拾號

土名墳後搖山下

山叁百陸拾步

以上山地俱係居美公支下已業自行取租輸糧餘產不悉載



宋居仁公葬衣冠 孺人吳氏墓

坐落二十二都三畝蜀源楓樹林地方

原賢字壹千拾柒號 土名楓樹林 墳地壹分捌釐柒毫伍

原賢字壹千拾捌號 土名全 墳地貳分壹釐肆毫壹

原賢字壹千拾玖號 土名全 墳地伍釐貳毫零捌忽

原賢字壹千貳拾號 土名全 墳地壹分捌釐柒毫伍

原賢字壹千貳拾壹號 土名全 墳地壹分捌釐壹毫貳

原賢字壹千貳拾貳號 土名全 墳地壹分捌釐壹毫貳

原賢字壹千貳拾參號 土名全 墳地壹分捌釐壹毫貳

原賢字壹千貳拾肆號 土名全 墳地壹分捌釐壹毫貳

原賢字壹千貳拾伍號 土名全 墳地壹分捌釐壹毫貳

原賢字壹千貳拾陸號 土名全 墳地壹分捌釐壹毫貳

右地係各支下已買營葬祖先其新文字號稅畝難查不悉載


續收

原賢字壹千貳拾玖號 土名楓樹林 墳地壹分貳釐伍毫

原賢字壹千叁拾陸號 土名全 墳地叁分壹釐貳毫伍

原賢字壹千拾陸號 土名全 山壹分伍毫

古關蓮花充象賢公諭墓圖



倣巨茲



宋漢公公墓

明諭葬大司空象賢公暨淑人汪氏墓

坐落古關一畝蓮花衝地方

盡字壹千叁百伍拾叁號 土名蓮花冲

地叁畝 玖分壹釐柒毫肆絲

盡字壹千叁百伍拾肆號 土名仝


地伍畝壹釐陸毫

盡字肆百伍拾壹號 土名 蓮花冲老婆塘下


田壹畝貳釐壹絲

以上係在墳田地餘產不悉載

許村源公墓圖



法郭何陽



宋源公墓

耐葬

森公 義公 耀公 安公 通公暨孺人程氏 宗益孺人方

氏 志公暨孺人汪氏 社與孺人程氏 景貴孺人吳氏

壽興孺人胡氏 顯爵公 明俊公 鍾孺人許氏 時俊孺人

居氏 鎮公暨孺人程氏 釗公 錠公 模公暨孺人戴氏

坐落十二都三畝金村鮑家墓地方

原拱字叁號 土名佛堂前 田壹畝柒分壹釐 貳毫伍絲

原拱字壹百肆拾玖號 土名墓後 田叁畝伍分

原拱字叁百拾叁號 土名 石村住前 田貳畝零捌釐 壹毫貳絲伍忽

原坐字陸號 土名金家店 田捌分叁釐

原拱字貳百拾玖號 土名瓦窰頭 地壹畝伍分 捌釐肆毫山稅成地

原拱字貳百貳拾貳號 土名瓦窰頭 地壹畝 山脚

原拱字貳百叁拾伍號 土名鮑家墓 地壹畝壹分陸釐 陸毫柒絲

原拱字貳百肆拾貳號 土名 鮑家墓前 地貳分貳釐玖毫壹絲


原拱字肆百叁拾肆號 土名 石村庄基 地貳畝貳分伍釐

帝字伍拾貳號 土名金村 倉屋 地壹分壹釐

以上田地山等稅俱係源公支下已業自行取租輸糧祀產不

悉錄

法苑中立



石塘墓寧公墓圖



宋聞詩公孺人王氏墓

耐塋

寧公墓


坐落十四都呈坎石塘墓地方

右山地田畝編號未能查載

法王晉卿



竹會寺
聞學公
墓圖



宋聞學公墓墓

耐塋

信公暨孺人汪氏 億四公 廣公暨孺人許氏 蘭公 高壽

公暨孺人吳氏 良公 晉寶公 慶師公暨孺人吳氏葉氏

小童公暨孺人江氏 禮得公 賢成孺人程氏 添貴公暨孺

人方氏 添與公暨孺人程氏 都貴公 社和公暨孺人程氏

景貴公 社大公暨孺人謝氏 珍公暨孺人許氏宋氏 壽相

公暨孺人徐氏 壽正公暨孺人吳氏 壽興公 晉生公 壽

富公暨孺人謝氏 壽旺公暨孺人汪氏 惠生公 鍾公 才

俊公 錦公 鐸公 昂俊公暨孺人汪氏 溥公 滿生公

海公 湘公

坐落十一都一畝豐口西山地方

原國字壹千陸百柒號

土名 塢坵 塢頭

田捌分伍釐

原國字壹千陸百捌號

土名 窰頭

田壹畝貳分 壹釐

原國字壹千陸百捌拾伍號

土名 窰頭

田叁分柒釐壹毫

原國字壹千陸百捌拾柒號

土名 窰頭

田壹畝 捌分陸釐

原國字壹千陸百捌拾捌號

土名 村前

田捌分叁釐肆毫

原國字壹千陸百捌拾玖號

土名 村前

田叁畝伍分 壹釐

原國字壹千陸百玖拾號

土名 村前

田壹畝伍分

原國字壹千陸百玖拾壹號

土名 村前

田壹畝 陸分陸釐

原國字壹千陸百玖拾肆號

土名 村前

田貳分捌釐肆毫

羽字壹千玖百伍拾叁號

土名 埕上

田壹畝貳分 叁釐

羽字壹千玖百伍拾肆號

土名 埕上

田捌分柒釐捌毫

原國字壹千伍百伍拾號

土名 塔稻坦

地壹畝貳分 貳毫

原國字壹千陸百拾玖號

土名 窰頭

地 壹畝貳分零捌

原國字壹千陸百捌拾陸號

土名 窰頭

地肆分 玖釐陸毫

原國字貳千叁百拾玖號

土名西山鮑塢

地肆分壹釐陸毫

原國字貳千叁百貳拾號

土名西山鮑塢

地伍分柒釐伍毫

原國字壹千陸百貳拾貳號

土名窰頭

山壹分貳釐伍毫

原國字壹千柒百陸拾叁號

土名西山嶺

山伍分捌釐叁毫

原國字壹千柒百玖拾壹號

土名西山嶺鮑宅祖墳後

山壹分陸釐柒毫

原國字貳千叁百拾玖號

土名西山祖墳山陸分貳釐伍毫

原國字貳千叁百貳拾號

土名西山鮑塢

山壹分肆釐伍毫

原國字壹千陸百捌號

土名窰頭

塘壹分伍釐伍毫

原國字壹千陸百捌拾玖號

土名村前

塘叁分陸釐貳毫

原國字貳千叁百拾玖號

土名西山祖墳前

塘叁分貳釐玖毫

羽字壹千玖百伍拾叁號

土名埕上

塘貳分


羽字壹千玖百伍拾肆號

土名埕上

塘壹分叁釐壹毫

以上田地山塘等稅俱係闈學公支下已業自行取租輸糧

法苑寬




雄村
慶雲公
墓圖



宋登仕郎慶雲公暨孺人汪氏合葬墓

坐落三十七都八畝雄村地方
按府志載二十八都共九畝內此載有誤

右山地田畝編號未能查載



沫灘 旌表
孝子壽孫公
墓圖



法江貫道

墓圖



歙邑黃翰如鑄

旌表孝子解元教授壽孫公暨繼配孺人方氏合塋墓亥巳向
坐落三十七都二畝涿灘胡家庄地方

孝字貳千叁拾號

土名胡家庄

山叁分壹釐陸毫

來龍並青龍山

孝字貳千貳拾玖號

土名龜尾

山捌分伍釐叁毫


孝字壹千伍百伍拾號

土名牌樓下


地叁分叁釐

以上係在墳山地餘產不悉載

做趙
大拜
筆



呂家林
寧師公
墓圖



元寧師公暨孺人余氏合葬墓


詹氏葬墓

坐落十九都 嵩巖鎮呂家林地方


白字柒百陸拾伍號 土名朱吳村 地貳畝捌釐肆毫肆絲

以上墳地係本支已業自行取租輸糧

曹渡橋深公墓圖




傲李伯時



元師山院長深公暨孺人洪氏合葬墓

坐落績溪下鄉十一都一保曹渡橋忘字八百七十號山三角
一十步

右照舊譜所載



林木嶺頰公墓圖

法雲
林華
意




元翰林修撰頰公暨孺人程氏合葬墓艮山坤向


坐落績溪縣九都八保過字六百三十九號山三十步土名株

木嶺鶴公塘上今土名七賢過關

右照舊譜所載



淪潭 旌表
孝子 燦公墓
圖




傲王叔明

墓圖

墓圖

墓圖



明旌表孝子贈兵部右侍郎邦燦公暨繼配淑人程氏合葬墓

坐落三十六都五畝淪潭地方

寶字叁千捌百伍拾柒號 土名淪潭 墳前

田叁分肆釐肆毫 伍

寶字叁千捌百伍拾捌號 土名仝


田壹畝捌分 玖釐柒毫陸絲

寶字叁千捌百伍拾陸號 土名墳山


山叁畝捌分柒釐 貳毫

以上田山俱係本支已產自行取租輸糧餘不悉載

宋村鳳
山道明
公諭
墓圖



做劉松年



明諭葬大司徒道明公暨夫人方氏合墓 山 向

坐落十九都九畝茆嶺地方

賓字壹百壹拾陸號

土名捲橋頭

田叁畝肆分壹釐陸毫肆絲捌忽伍微

又同號

土名全

地壹畝柒分叁釐伍毫伍絲

賓字壹百壹拾柒號

土名全

山柒分玖釐柒絲伍忽

賓字壹百貳拾壹號

土名大塢山

山壹畝陸分捌釐捌毫

賓字壹百貳拾貳號

土名全

山貳畝陸分柒釐陸絲貳忽伍微

賓字壹百壹拾陸號

土名捲橋頭

塘肆分柒釐伍毫伍絲伍微

賓字叁百叁拾貳號

土名社屋充

塘壹釐柒毫陸絲伍忽

賓字壹百貳拾號

土名方坵

田壹分肆釐陸毫伍絲玖忽

賓字叁百叁拾壹號

土名社屋充

田貳分陸釐叁毫捌忽捌絲

賓字壹百肆拾肆號

土名大塢口

田伍釐玖毫叁絲伍微

賓字壹百壹拾柒號

土名捲橋頭

山捌釐柒毫玖絲

賓字壹百壹拾陸號

土名全

塘伍釐貳毫肆絲叁忽

賓字叁百叁拾貳號

土名社屋充

塘壹釐叁毫叁絲伍忽

賓字壹百壹拾陸號

土名捲橋頭

地叁分肆釐柒毫伍絲

賓字壹百壹拾柒號

土名全

山壹分柒釐伍毫伍忽

賓字壹百貳拾貳號

土名大塢山

山伍分叁釐陸毫壹絲貳忽伍微

賓字壹百壹拾陸號

土名捲橋頭

塘壹分肆毫捌絲伍微

賓字壹百壹拾陸號

土名全

田柒分陸釐肆毫

賓字壹百肆拾肆號

土名大塢口

田貳分肆釐肆毫伍忽

賓字壹百壹拾陸號

土名捲橋頭

地陸分玖釐伍毫

賓字壹百壹拾柒號

土名全

山叁分伍釐壹毫陸絲

賓字壹百貳拾貳號

土名大塢朝山

山壹畝柒釐貳毫伍忽

賓字壹百壹拾陸號

土名捲橋頭

塘貳分玖毫柒絲肆忽

以上田地山塘等稅俱係道明公支下已業自行取租輸糧

法李營
邱



德公塘泰護公墓圖



明泰護公塋墓

坐落二十二都九畝棠樾德公塘地方

四字柒百柒拾號

土名德公塘


田稅貳分

同號

全

山壹畝壹分伍毫


以上係在墳田山其祀產在他處者茲不備載



傲劉





棠樾圖



賢崗

大和社

蜀源圖




蜀源圖




募道千里

圖


巖鎮圖




黃山橋圖




做李思訓



希大
公書
院圖



再傳雲林
潛邨許康筆



棠樾鮑氏三族宗譜卷之一百八十三

西疇祠條約

祠堂所以

尊祖尊祖所以敦睦一本之義既明親愛之心自起此固建立
 本意若分門立戶恃強凌弱雖建何益至於附祀賢者附之則
 人皆勉於善貴者附之則人皆力於學出財而惡者亦附之則
 親為子孫者皆知立業以伸祖考之敬此固附祀本意若計利違
 義各圖己私雖祀何補凡我宗人宜悉此意租穀之入二祭之
 外餘銀存匣以候修舉眾事不可各收己身如有違執亦勿爭
 論以傷大體但祭版不列先名分胙不頒其分使自省

明隆慶元年七月二十六日

思菴諭言

棠樾西疇書院儀禮

一元旦黎明守祠人燃香點燭啓門辰刻管年者令守祠人聚鼓樂鳴鑼三次派下子孫在家者俱各盛服鼓樂前導至祠前聚齊祠內擊鼓三通衆入門升階贊禮先入立於東階上唱序立鞠躬伏興四拜平身焚楮錢禮畢贊禮降就位四拜族衆東西於堂上未冠者雖分尊卑亦同列於階下相向二拜拱揖而退鎖外柵門至晚守祠人燃香拴鎖內外門如初管年者給樂人酒銀三分鳴鑼人菓酒銀一分俱先年稱定至與期給

一初二日早管年者令守祠人啓門燃香候南極觀道士至引入中堂行四拜禮畢送至該管之家照舊規祇應

一初二日早飯後命守祠人鳴鑼凡誕子新娶子弟各具香楮邀衆詣書院會敘展拜畢照舊規定銀書單俱限初五日送書院交收遲違一日者罰銀三分衆推子弟中能幹者四人買辦酒穀燈燭

以備送燈慶賞等用除支用外剩銀限正月二十日事完卽登簿付管年者收查

一十三日下午管事子弟會同管年者將所辦酒穀等物陳設祠內令守祠人鳴鑼至黃昏各接燈子弟具香楮聚於祠中聽候唱名行四拜禮讀祝焚楮錢畢分列兩傍照舊規秉公粘闔跪領酒菓次第由中門鼓樂導送各家不許攙越紊次本年內有續娶接燈者不必粘闔俟正燈畢依名分序齒先後一同鼓樂導送其各家迎送相待豐儉隨宜撐燈鳴鼓樂人等照舊規給發

一書院門內俱不許放火銃爆竹煙花違者罰銀一錢

一各家打鑼撐燈人等俱列於兩廊不許上堂喧嚷

一十三五十七俱照舊規賞燈各依名分列坐毋得紊亂爭嚷未

冠者不許入坐

一接燈子弟照舊供奉酒菜不到者罰銀三分

一十四十六好事者各自備酒殺賞燈

一該年管事者分班每夜照點燈燭各分子弟俱要相助不許推調

坐視

一管年者先於初五日會眾議辦花燈油燭該收買者遣人收買該

修整者令人修整收支銀兩先記草賬候二十日付眾查算登錄

一派下子孫因事至書院俱於中祠總行揖禮

一管事十二名各分輪流推其能者而代之名不許易

一賞燈毋許猜拳執骰喧嚷歡呼

祭禮

一二月十五日迺

登仕公誕辰故每年二祭春以二月十五日秋以八月十五日舉

行管年者先期會眾定買猪羊五日前買辦祭品免臨期遲悞

一先期五日僉配禮生大約以立主次論各分人數多寡依後開各分臨期推舉衣冠整肅禮度優閑者開名送書院填註歷年既久自然溥遍均平

一每祭正獻一人 東祠分獻一人 每分輪推 西祠分獻一人

俱宣忠堂 通贊執事約三十餘人 斯文約十餘人 二十里之內無

大故而不至者罰銀五分公用

思誠公 分下二人

思齊公 分下二人或一人元亨利貞輪配

思敬公 分下二人

文芳公 分下二人或一人文行忠信輪配

孟本公 分下四人 昌公分下二人 安公分下二人

士善公 東津公 分下三人 以上各分如遇輪該正獻分獻者各減一

人

誠孝公 分下三人

鄧山公 分下二人

養和公 分下二人

豫齋公 分下二人

其省牲監宰陳設監造等大約十二三人俱配本年管事者

一祭前三日將正獻分獻禮生人名書列粉牌懸掛祠門俾各知所司并將規條內緊要者摘寫揭示使衆通知遵守

一先期一日下午俱至書院習禮執事於書院門外少西設省牲位香案紙燭酒爵正獻引禮二人執事一人俱盛服具鼓樂引禮引

正獻詣省牲□□執事詣牲所省畢詣正獻曰告充正獻舉爵奠酒焚楮遂刑牲執事□二盤盛各毛血少許付陳設收于淨所乃布灰格而退

一監造陳設督同廚役人等依式整理祭品務要豐潔毋得苟且應

事

一祭之日五鼓執事依圖陳設聚鼓樂味爽鼓初嚴同至祀所鼓再嚴各具服鼓三嚴各供其事三鼓已畢助祭後至者免入班不許領胙執事人等後至者另議罰

一序立各依世次為班不許紊亂

一年高不能拜伏者立於西序監禮

一年幼未冠者立於西階觀禮

一助祭人等俱要青衣整肅冠履鮮明褻衣素服不許與祭

一遇二祭派下子孫有願請燭者先期告於陳設至期以燭易之註名於簿誕子之日分為三等一等出銀一兩二等出銀六錢三等出銀三錢送祠置辦祭品

一當祭不許婦婢抱領嬰孩入祠以防污穢

一書院會敘乃禮義相先之地當祭迺

祖考陟降之時各派子孫俱要肅恭致敬不許喧嘩忿爭不許訕言嬉笑助祭人等違者罰銀三分執事人等違者罰銀五分送祠公用

一元旦元宵春秋二祭但遇洞開中門各派子孫出入不許由中道一祭畢管分胙者至大門外凡執事禮生助祭人等俱發一小票各自註名并某執事午刻時票交祠領胙

一管分胙者俟衆既退將胙肉照規稱足收票領給務要分宰公平毋得徇私招議事畢填註於錄以備查考

一受胙每祭 宣忠堂送 羊胙二斤 猪胙二斤 時菓二盤

壽桃三雙

正獻 受羊胙二斤 猪胙一斤 壽桃一雙

東分獻 羊胙各一斤 猪胙各一斤 壽桃各一雙

西分獻 羊胙各一斤 猪胙各一斤 壽桃各一雙

禮生 羊胙各半斤 猪胙各一斤 壽桃各一雙

助祭 猪胙各半斤 守祠 廚子 使用 猪肉各半斤

一春秋祭品之餘係管年執事等分散以償一年任事之勞

一禮生兼攝者止受本胙不得兼領

一僉派禮生各分輪流均配毋得恃強凌弱徇私誹其所不欲雖憑各分□報亦當輪流週遍毋得徇私以致爭競

一書院中除晒膳營租利置辦祭器等項外不許借與一應人等晒曝各物役用工作及堆放凶具木料稻草并穢污之物違者罰銀一錢

一書院中不許住宿貴客不許僧道張掛祈禱演戲還願違者罰銀

一錢亦不許安歇倡優雜劇等人飲酒列席欸待脚夫違者罰銀

二錢

一派下子孫發身庠校登科及第享年誕子族衆舉賀餞行稱觴搬戲者斯皆足以光耀宗祠聽衆於書院內舉行不在禁限

一書院中或有士夫嘉賓燕集投壺局戲者不禁此外但有派下子孫三五成羣邀率在內圍棋雙陸鋪牌鬪葉鞠毬習武賭博穢污者每事罰銀一錢

一書院中除講讀鄉約舉行冠禮會文習儀外但非族衆公舉一應嬉戲等事俱在所禁臨事會衆量輕重議罰

一祭品五棹

每棹膾一牒	係紅肉	共五牒該肉二斤
炙一牒	係炙割	共五牒該肉二斤
魚一牒	熟	共五牒該魚二斤
脯一牒	牛脯	共五牒該牛二斤
醢一牒	炒骨	共五牒該骨二斤
蔬菜芹各一牒		共十五牒
鹽二牒		共十牒

約銀二分

約銀二分

約銀二分

約銀二分

約銀二分

約銀二分

約銀二分

約銀二分

菓三盤	棗二斤半栗二斤半	共十五盤
壽桃二盤	計一百隻約廿斤	共十盤
羹飯各一盂	計米五升春熟	共各五盂

秋祭用時新菓

約銀一錢

約銀一錢三分

約銀三分五厘

中祠加猪肝一盤 羊肝一盤 猪首一盤 雞一盤

計二斤約銀三分五厘

計二斤約銀三分五厘

計二斤約銀三分五厘

計二斤約銀三分五厘

魚一盤

計二斤約銀三分五厘

以上俱用熟

猪二口

全一口仍一口除祭品外存分

羊一口

約五十斤約銀八錢

紅燭二斤

內二兩一枝者五對餘每枝一兩

大紙三百張

約銀六分

柴七分

花椒大料紅麴醬

二分

香油三分

樂人二付

本村四人每人三分外村四人每人三分五厘

刀手工三分

分胙工二分

廚子二日二人

工八分

每肉半斤

酒四壺

內省牲一壺

省牲紙一分

帛一端

一錢

炭炙肉用一分

祝板紙等二分

沉速香二分

洒掃人二日

銀六分六厘

每祭約用銀五兩

一祭禮儀節 俟鼓聲畢

通贊唱 執事者各司其事 陪祭者各就位 分祭者各就位

正獻就位 引禮至正獻分獻前唱就位

通贊唱 瘞毛血執事者二

人升自東階至中案下捧毛血盤降自西階由中門出置西廊下俟望燎時入坎

通贊唱 參神鞠躬伏興四拜平身 行降神禮 中祠正獻引唱

詣盥洗所 盥手 悅手 詣香案前 跪 三上香 奠酒

酌酒 伏興 平身 復位

通贊唱 奠帛行初獻禮 正引唱 詣酒尊所 司尊者舉冪酌酒

司帛司爵各捧先行 正獻帛爵自門入升東階東西配司

爵自東門入 及階 引唱 詣 登仕公神位前 跪 奠帛

執事者以帛跪進於右興跪受於左奠於案上 引唱 獻爵

與奠帛同 引唱 詣讀祝位 跪

通贊唱 衆孫皆跪 引唱 讀祝 祝跪讀於正獻之左 通引齊

唱 俯伏興平身

通贊唱 行分獻禮 東西引唱 詣盥洗所盥手 悅手 詣酒樽

所 司樽者舉冪酌酒 正獻引唱 詣東配神位前 跪 獻

爵 俯伏 興 平身 俟東西分獻及階 正引唱 詣西配

神位前 東引唱 詣東祠神位前 西引唱 詣西祠神位前

三引同唱 跪 獻爵 俯伏 興 平身 引正獻分獻以

次降自西階 各就其位 各執事後從各復其所

通贊唱 鞠躬伏興二拜平身 行亞獻禮 與初獻同止進正獻

一爵不讀祝不分獻

通贊唱 鞠躬伏興二拜平身 行終獻禮 與亞獻同

通贊唱 鞠躬伏興二拜平身 飲福受胙

引唱 詣飲福位 執事二人一執爵酒一以盤取一羊肩隨其

中祠陳設之圖

羹 脯 蔬 芹 藁

爵 膾 鹽 菓 雞

爵 炙 芹 菓 醬

爵 魚 鹽 菓 魚

飯 醢 菜 犂 藁

中祠酒三爵

俱正獻進上

東配西配東祠西祠各棹陳設之圖

羹 脯 蔬 藁

膾 鹽 菓

爵 炙 芹 菓

魚 鹽 菓

飯 醢 菜 藁

各棹照神主每位

先布酒一爵獻持

每棹摠進酒一爵

棠樾鮑氏三族宗譜卷之一百八十四

史傳

宋史孝義傳載第二百一十五卷內

開府儀同三司上柱國錄軍國軍事前中書右丞相監修國史領經筵事都總裁臣脫脫等奉

勅修

鮑宗巖字傅叔徽州歙人子壽孫字子壽宋末盜起里中宗巖避地山谷間為賊所得縛宗巖樹上將殺之壽孫拜前願代父死宗巖曰吾老矣僅一子奉先祀豈可殺之吾願自死盜兩釋之

明史列傳載第一百九十八卷內

總管總理事務羅護恩保兼太子太保保和殿大學士兼實都戶部尚書事加級張廷玉等奉

勅修

鮑象賢歙人由進士授御史歷雲南副使

嘉靖十五年冬廷議將討安南兵事一決於汪文盛

公言剿不如撫卒如言

毛伯溫檄文盛會師以象賢領中哨屢遷右副都御史

巡撫陝西代石簡撫雲南初元江土舍那鑑殺知府那憲以叛布政使徐樾往招降被殺簡攻之未克坐樾事罷而象賢代之乃集土漢兵七萬以討鑑懼仰藥死擇那氏後立之遷兵部右侍郎總督兩廣軍務賊魁徐銓等糾倭橫海上檄副使汪柏等擊斬之廣西賊黃父將等擾慶遠擣其巢大獲子象賢一子官入佐南京兵部被劾回籍聽勘家居十年起太僕卿復以右副都御史巡撫山東召拜兵部左侍郎年老引去隆慶初卒

貴州名宦傳

萬曆二十六年載貴州志

鮑道明字行之歙縣人嘉靖四十年以副都御史巡撫貴州先時容山土酋韓甸糾諸洞雲擾所過堡破落焚數十年來勢甚猖獗公以大義徵諭土兵分遣將領生擒賊苗普哥等三十八人馘斬一百四十八級又設奇殺傷洩死二百餘苗賊首韓甸一家九口及其黨與二十人皆以次就縛復斬容山景洞等處逆苗八十九級生擒四人

負固諸夷一旦平服時公南遷廷尉未上其事貴州巡按御史巫繼咸題核 上賜銀幣有差

新安先達傳

載郡志

洪焱祖

潛夫杏庭

鮑壽孫字子壽歙縣人歙名儒大族特多槐塘程氏有訥齋丞相程公元鳳稠墅汪氏有淞東提刑汪公應元溪南吳氏有耨齋吳公自中山前汪氏有制幹山泉汪公儀鳳他如呈坎羅氏茅田方氏巖寺呂氏長林跳石鄭氏葉有曹氏與棠樾鮑氏皆顯顯者壽孫乃棠樾處士宗巖字傅叔之子其祖母乃提刑之姊而丞相乃提刑之表兄壽孫之祖姑實生制幹而長林鄭氏有菊存公天麟者乃自溪南吳氏來繼即壽孫之母舅壽孫早慧提刑嘗教以童子科丞相以門客登仕郎奏薦咸淳丁卯中江東漕解第一時年甫十八至元丙子郡將李世達軍叛歙西北鄉郡賊竊發肆其斬馘富者皆不能免或曳壽孫父子至賊魁前子願代父死父願代子死賊魁醉亦心哀之顧

求金不已聞有騎軍至賊駭散父子俱免歸附後歷杭州許村鹽場
管勾徽寶慶二州教授其在鄉學整葺一新同郡虛谷方公回爲之
記講學有源委詩工而不刻註易未竟而終

棠樾鮑氏三族宗譜卷之一百八十五

傳

鮑孝子叔和傳

趙 沆

子常
東山

鮑孝子諱元鳳字叔和世家棠樾爲歙碩宗會大父慶雲故宋儒者
試漕闈補特奏官不仕大父諱珪父諱回皆雄於產叔和生有至性
於家庭極和睦至正壬辰二月紅巾賊起斬黃破江饒四月踰婺源
陷郡城於時老弱狼狽奔竄叔和母吳氏耄矣兄弟聚議避兵叔和
泣曰妻子固宜生全然母一而已脫有不虞爲子者寧獨生耶乃奉
母氏挈家默居劉村青山且暮瘁力爲養俄而賊酋項奴兒縱賊四
掠人人鼓慄莫克自保叔和語其妻子曰勢誠急矣若等各保若生
假天祚我家骨肉圖再聚也遂籲於天戴星裹糧躬先負母遠行深
入巖穴間屨緹梯攀艱苦備至繼而間行蹤詢妻子薄暮偶會恍若
神爲之導者母驚且喜曰吾兒捨妻子脫我於難天實知之獨惜廬

舍已燬將奈何叔和跪以請曰願高眠食無恙雖亂離無足慮也亂定還鄉葺理舊廬觴豆爲樂復如初閭里嘖嘖稱其孝叔和從子伯原山長余老友也每屬余紀其事乃次第爲之傳焉

東山趙汭曰昔江次翁負父避亂於臨淄負母避亂於下邳人稱其孝鄧伯道棄其子以存其弟之子人尤義之余觀叔和事甚與次翁相類至其權於重輕臨難急保其母而卒全其妻子此則伯道之所難者鮑之先有傳叔子壽二先生並以孝義書於宋史叔和克濟其美者耶嗚呼民俗既降德色諄語於其親者不尠也觀風於鄉井者盍表吾叔和以爲勸哉

事載府誌
崇祀孝子祠

翰林修撰同知耀州鮑頰公小傳

失名 出家乘

公諱頰字尙綱常侍父與諸儒爲文會於耕讀堂講窮經史性命之理兼善楷書篆隸之學當國朝開運以薦應詔舍尙賓館編史進呈受官監築大社大稷壇制立翰林院改除編修 上視在院詞臣特

公身貌修俊因目之曰長秀才每有名則曰長秀才云明年戊申紀元洪武陞修撰同知制誥兼國史院編修常從侍 上御謹身殿顧

謂廷臣曰北平建都可以控制胡虜比都南何如對曰胡虜起自沙漠立國在燕地道天運固各有時今南京乃興王之地宮室已完不必改圖傳曰在德不在險是也又問外京各處官員所在任久不調致興害作弊法當任調何如因舉借寇故事以對在廷稱善己酉春

三月辛卯清明壬辰詔扈從登鐘山 上奉御擁翠亭給筆札命賦

詩隨同朱升張以寧秦裕伯單友中李某鐵冠道人等六人得應制

上親唱和遊崇福寺錫宴而還 東宮愛公文雅常被恩顧一日召進內殿堂門壁上題寫文詞 上覽而喜曰此長秀才之能書者也

以尙膳食之尙書張復初任吏治嫉儒術適陝西耀州新附謂地方民困且饑要必有儒術才德兼備者撫治其間特奏保公同知是州命下卽往領州縣人民通赴孟津給粟宣諭恩化境內有從張氏僞

官許玉者爲民害公率弓兵盡獲其類淳化鄉奸吏欲就事取功逼民增加田畝起稅乃往覈去其虛增者糧萬五千石同官縣民僞趙左承掠平陸縣民家女年十三執而歸之歲辛亥秋奉表詣闕光祿賜宴將辭謝上疏乞歸省遇西安府經歷常達以事到京常以事謁未得遂牽連誣置公於獄法司承旨開爲欽錄事內官員一體坐誅重則沒籍公竊惟一身父母俱老十月五日上表陳情不報東宮請原其罪弗允因其表再爲請亦弗允已反復請曰是人行端才長且達所指事非其罪願請釋之明日二十八日又以其表進准復官公已於獄中暴卒未卒前二日在獄書敘遺文于有餘言未賦望雲辭一章托孤詩一章題畫一章美人圖一章寓意深切書畢慷慨自如曰吾事決矣遂卒所作詩文有升客稿聽雨軒稿二稿皆居官所作先是東宮聞公死輒頓足興慨特容旨下應天府辦祭以禮祭之而給驛歸葬焉子一宅相

處士相一公傳

失名 出家乘

相一公諱宅相字必成生而母夫人尋卒七歲而翰林公卒於官遺祖父母身老在堂繼母宋宜人年甫二十四在任匍匐扶襯歸勵志守節恩勤撫致督之而日趨於學又八歲遂能知所成立於凡古今嘉言善行則必謹識之將以求踐乎其實而猶值世運初開門戶多擾時稠里處士汪處善公者爲鄉巨擘以女與議婚其族里有阻之者曰嫁必須勝吾家是子孤且弱其可乎曰無傷也其家世詩書令德彰著而其祖若父盛德被於民惟深則來者豈有不昌耶女可歸之既長而笄宜而家隨相克諧恭順凡所事於母者無不至由是家益安遂而身世益以昌矣槐塘程氏姊家經遭多難窘乏不能自存常減已用以周之撫視孤甥以底於成同姓族弟士中爲斷指事遇例當永戍每欲以身自盡免累其家屬公竊往止之曰例行必不久且默藏匿以俟赦所親曰事必累及鄰里將奈何曰波及鄰里罪猶

可當吾不忍其人罹此死煙瘴也願盡力資費以爲贖無所悔也後
例革得免士中德之稱之爲再生父母庚辰歲饑以產易米百餘石
上之官以繼母宋氏貞節請給旌命樹表於門是雖所志所願亦
皆孝義所感發其有關於風教甚大也三子瑛寧復也

吮疽傳

林則明

鮑燦字時明歙之棠樾人實宋孝子壽孫六世從孫也時明孝出天
性一出言舉足不敢忘父母嘗挾重貲客汴洛間得一珍異必寓歸
以進未嘗敢私值父母慶誕日弗與因形於詩有庭闈應有歡聲洽
客館翻多感慨生之句周王殿下聞而嘉其孝大書扁其堂曰存
愛以榮之成化丙戌歲母余氏年七十餘足患毒疽不利於行或啓
處時明晝夜恆負而挾之歷時既久更數醫罔効瀕於危殆時明心
驚每夕焚香籲天求以身代寢至長夏腐穢不可近時明旦夕跪而
吮其膿如是者屢屢無倦至毒氣觸臟腑嘔逆成疾不能食飲人皆

危之時明不自愛未浹旬母氏疾果愈時明亦復無恙此非孝感所
致者乎昔人奉母每夕親爲浣滌廁踰者史臣尙以爲難筆之於傳
較之吮咀非人之尤難者耶人之尤難者且爾其他所行不問可知
是尙不得爲孝子矣乎嗚呼世有視親疾而不藥母歿而不臨者其
視時明孝不孝何如耶余與時明之弟時瑩交最篤吮咀之事耳熟
久矣已而歎之士夫君子亦稱時明之孝過人真可謂人不間於昆
弟之言無忝於遠祖壽孫之孝矣是豈可使其泯泯無傳與草木同
朽腐者耶古人有言位登台輔也爵列三公也祿積萬鍾也馬踰千
駟也歿之日曾不得與韋布行孝之人隸齒者豈有他哉以其有關
於世教民彝之大也余故特爲吮疽傳將以愧天下後世爲人子之
不孝者抑亦以俟秉史筆者他日有采焉

成化乙巳菊月朔旦

迪功郎南京國子監助教長樂林則明撰

友善老人傳

楊循吉

君謙

老人姓鮑氏名珍字時瑩新安舊族也由宋以降世居棠樾里中里環數百爨皆一姓其先有以孝行載信史可考鮑室素鉅老人蚤以世家子出商於汴汴故都會游者率帶歌酒誇紈綺鮮克儉約老人獨持恭儉跬步不肯棄禮法藿鹽韋素盡斥去浮華一意治生棋博倡優之好略罔置念暇日惟樂與其貴公名士游處貴公藩臬則江副商佐吳提學原明開封教授林達夫鄉宦則和僉憲振綱名士謂解元李宗一見貧病危厄輒出貲救之排難解紛亦往往竭力不責報伴讀亦門舉人謝仕俊病疫家人盡死為起其生且歸其妻子之喪又嘗赴汴道遇杞之士王景曇同舟偶疾作幾殆親調藥治之而愈又鄉人張從政死於汴為經紀其後事評者疑其俠或曰是君子而隱乎旅者也其行誼修飾不可誣蓋明甚咸以為然老人處汴四十年往來新安歲或一交雖雅意賢遷而所作良事在在而有嘗入小溝收茶遇一老嫗墜左股子工於外貧無藥食輒給而生之及在家聞宗婦投水急出之覆臥牛背上牛行水出盡而甦又族有贅他氏子孫貧無依者作室名還與之居又所與同舟杞縣王生至考城被盜夜莫知所在因求之得于叢葦中相與白官盡

獲其賊賊誣地之王老亦論死憫其無辜又言於守願棄所失宥之乃得釋其心務於濟物垂名未嘗少懈用是所積日充而賢名亦偕起至聞藩府歲時設宴於承運殿每得預列而部使者吳天宏亦因官汴雅加敬禮至則造其廬然老人無他崖異始終惟以忠信自守而已感致優禮無間遠近人謂布衣獲榮所鮮有老人既老不欲客外一旦謝所知逕歸歸而擇勝地作園亭自娛樂時與其宗齒德齊者為會其中其汴之業則授其子姪俾嗣勿替一族尊事取法焉因其稱之為清逸翁其平生所號別為友善老人云老人家居早歲嘗作塘場利鄉人晚又購地為義塚

新安土狹人繁多不克葬至是塚成貧者多便之或無棺及不能埋殮皆周其事他所施棺槨又靡計其在江湖見溺而手援以活者四人汴之城南渡覆舟人泗州之山下風蓬掠下舟子淮安之倒船墮水軍宿遷之自投船婦皆獲救生其垂死病者二人謝仕俊及張從政見前歸人之孤與白冤獄而出其命者各一人弘治己酉河南饑買一僮頗俊爽後知其為洛陽城儒家兒因略而至呼其父遣還之不受其他瑣瑣皆不

價兼給衣履弗之奪又汴城酒徒羣毆一人死誣薛氏孤子使抵死罪知其冤密白憲司出之薛不知所自

書

贊曰世之人材其爲品良夥然求能脩謹而幹濟者繁幾其兼益優於德則短於才賢乎已則薄乎人莫不然也孰有立人生之常業佩孝廉之美行而又汲汲以行仁爲務者哉友善老人不儒名不仕職其所爲若是蓋有彼流萬萬不及者將詩書逢掖未必無小人竄其間而田野之完淳固自若歟由是言之然則老人身膺章服以列賓於鄉飲而荷 國家之寵光信乎無忝也已

蘇臺外史楊循吉造

兵部左侍郎贈工部尚書思菴鮑先生傳

失名 出家乘

先生姓鮑氏諱象賢字復之歙棠樾人童時讀書處忽產靈芝嘗以書籍爲鼠啣戲牒土地神詰朝有鼠十餘若伏罪狀自殞於地人以爲異正德己卯舉於鄉又十年爲嘉靖己丑舉進士己選四川道監察御史遇事敢言當路者嚙之出爲湖廣按察僉事先生故人皆曰

鮑君伉直不久留內果然也先生謝曰仕不擇官官不擇地時先生所部當荆鄂之衝素盜藪也至則詢諸父老因得廉盜酋數人名見責問貫其罪令致諸偷以自贖更相追捕盜漸衰息里人吳賢以忿爭誣命論死先生視牒知其枉卽爲開釋或以爲嫌先生曰吾知有法耳豈以鄉人故陷於死地而不恤也未幾以中丞顧東橋公疏薦陞雲南按察副使備兵臨安會 朝議征安南先生力陳不可其後安南竟如先生議來歸降褒賜銀幣滇人喜曰生我者鮑公也肖像祀先生以外艱歸復除陝西副使時有花馬之役先生叅謀督府諸所防禦皆爲決策邊境晏然陞雲南右叅政進按察使江西右使陝西左使所至亢績騰聲中外想望風采其年匈奴大舉入寇烽火達甘泉 廷議推先生遂以右副都御史巡撫陝西所在治辦察幽隱謹斥堠將士人人思奮俘斬甚多兩獲銀幣之賜踰年沅江逆酋那鑑倡亂誘殺方面大臣 詔改先生巡撫雲南先生至則宣示 國

威喻以禍福方略教導禁姦止邪逆酋由此自殺餘黨解散勳臣沐氏朝輔死嗣絕妻詐取他人子與輔弟朝弼爭襲奏勘久不決先生引輔母爲質必襲朝弼且曰母卽私弼猶不失沐氏後設輔妻所爭非類失更遠矣衆語遂塞尋陞刑部右侍郎改兵部兼右僉都提督兩廣軍務於時猺獞出沒道路梗塞劇賊徐銓方武等勾引倭奴縱橫海上而李文伯等乘機哨聚亂若沸湯先生飭將吏明賞罰申號令聲討所至斬級千六百有奇捷聞 詔錫銀幣廕一子尋改南京兵部右侍郎俄而有以蜚語聞者 詔賜先生休沐歸家踰伏林泉如是者仍十有餘年足跡不入城市久之 召補太僕卿時山東亢旱道殍相望進先生以少司徒兼中丞往撫之東人知昔嘗觀察我者有惠政無不引手加額已而連兩年穀登東土底寧尋遷兵部左侍郎再疏乞歸 溫旨勉留會哭其蔭子又喪曾孫陳請益力奉旨歸僅一年捐館舍矣有 詔贈工部尚書給祭葬先生胸次洞廓

事體練達敷歷中外三十餘年剖大決難悉中機宜所至動稱神明然天性峭直不能與時俯仰以此聲名益顯而攬忌益多議者猶以先生之才爲不竟其用也惜哉

南浦子傳

汪思

南浦子姓鮑氏名若川字懋融世歛棠樾棠樾東廿里許曰南浦南浦之水會徽流之所聚淵乎不知其底止茫乎不知其畔岸浮光躍金靜影沉璧信有若昔人之所云者甚奇前有岑山突乎波心草樹葱倩倒影入溪又奇水石交錯天風一過乃生層波隨水大小雲蒙雪噴令人心目洒洒則又奇懋融少悅之未契之也乃曰泉石之幽邃孰若江海之壯浪余將豁余目拓余胸浩蕩潏沉大道爲宗不亦快乎中歲則契其真矣幡然曰盍歸風濤之悒人又孰若斯浦之足以終我也耶於道罷遠遊日出而玩日暮而歸明日復然以風雨之無蔽也乃營於浦之左而亭其山焉客有詩之者懋融方浩然長嘯

撫其亭而歌之曰南之浦兮其波盪之朝余藻厥塵兮夕以忘歸又歌曰浦之南兮離明融融余以明吾德兮焉知所終客揖而進曰樂哉懋融乎歸之忘也立入矣終之弗知也神至矣立入忘物矣神至忘我矣嗟懋融何爲而不樂哉請命懋融曰南浦子懋融咲曰有是哉南浦我乎我南浦乎叔氏起之傳其事於余余倦遊而隱者喜懋融之歸自江湖而獲有茲也因爲論著之方塘居士曰海贊扶南江頌灑灑此天下之大浦也以之娛人人亦以之敗孰若茲浦之足終乎是故觀之壯者畏斯存玩之幽者思之斯立舍此取彼懋融亦可謂智矣嗟夫其偶然邪抑其非偶然邪夫自有宇宙卽有此南浦未見能有此南浦者茲乃是懋融懋融遭南浦乎南浦遭懋融乎

嘉靖癸巳臘月既望

賜進士中憲大夫雲南等處提刑按察司副使前刑科左給事中侍經筵官翰林院庶吉士致仕方塘汪思撰

都勻守文輿鮑公傳

失名 出家乘

文輿姓鮑諱獻書字公益號衡岳夢神人別錫字文輿家世自宋居歛之棠樾文輿生有殊質髫年母寢疾劇密禱於神願以身代母卒大父憐愛之出就外傳傳以失恃兒寬若程文輿不自寬也藏燈丙夜呶唔不輟戊午籍諸生甲子以高等廩於學宮發憤居九子山茹蔬苦讀凡三年學成會 穆宗卽位 詔天下不次選文學文輿獲雋廷試占第七人六試應天不遇乙酉再試順天再不遇謁選得曲陽令歲祲疫作文輿恤傷軫困不啻痲痺切身邑控岡阜地窄糧重文輿履畝定稅分四則徵科而民始知生所地砂礪不宜禾黍課民樹桑棗株子一錢而民爭荷鍤從事不二年青綠徧野矣祛弊興利留心讞獄有趙邦民者蚤孤母執節守之長爲納婦婦悍甚每伺邦民出凌姑姑惡傷邦民意含憤不言久之自投於井婦窘亦自縊邦民歸見婦縊急解之而不知母已死矣前官以不先救母與婦並論

死文輿判之曰邦民倉皇外至見懸梁婦未見投井母其情可原也且母數十年苦節守三歲兒爲存趙氏祀也應誅孽婦以報冤姑留孤兒以慰貞母當贖之邑額種馬六百匹歲歲牧民賠課三千兩有奇文輿力爭於大中丞宋公去任猶關說於當事者得豁去民感深刺骨其朔生祠於城隍廟側歲時俎豆之戊子入觀邑民繪像戴於首號呼遮送馬不得行先後薦剡凡十九上辛卯秋徵入京百姓號擁加於昔日壬辰四月擢南京戶部山東司主事分督鳳陽倉儲文輿不悛堂簾米解令得與倉吏爭平槩銀解令得與庫吏爭平衡民甚便之轉廣東司員外郎還督京倉如鳳陽時甲午二月晉南京刑部郎中蕭然冷局簡損白役不徇請託獄求得情戊戌出守都勻府都勻城郭孤懸苗夷錯處蠻煙瘴雨白日爲昏文輿以中國之治治之不徵餘耗不縮廩餼不苛役民不侵商販民大悅服時值征播之擾大軍促餉一日二書告急文輿轉輸有法至無愆期二軍踴

躍奮攻全黔論功文輿爲最文輿曰元克蕩滌國之福也身不歷疆場安敢言功三上章請致政不得播平大宴當道躬請又不得神色銷落蓋自播亂經年內虞城守外虞濟運至於事勢掣肘圖迴達旦血綫綫從咽中出日甚一日嘆曰爲國亡軀亦復何憾憾不及與諸兒一面付囑先人此爲耿耿耳拱默而逝時庚子仲秋廿八日也文輿與人交中無城府笑語移日不以材智自見恤問親族知故人當心仕至二千石田不增一塋屋不益一椽自筮仕以至皓首爲國爲民一念可貫金石可質鬼神所謂清白吏公爾忘身如文輿者真無忝哉

寶慶郡丞龍台鮑公小傳

失名 出家乘

公諱良守字有民以祖兆在龍門之岡自號龍岡後爲龍台云世居歙之棠樾鮑固望族公家又數以科名顯父東津公舉於鄉歷仕中大夫贈厥考誠菴公如其官配程宜人舉伯子繼汪宜人舉仲若季

公其仲也宜人孕七月而生公幼孱甚稍長嗜學不厭東津公遊宦
滇南時以公從滇南荒服寡載籍公多方購得之每誦至丙夜不休
時有侍兒習秦聲聲達戶外公若弗聞也者弟以誦習聲與相應答
東津公喜謂孺子可教左司馬思菴先生一見歸語諸子姪曰如某
者足亢吾宗爾曹效之勿失也是時許文穆公聲張甚公與之爲昆
弟交隆慶丁卯以毛詩領薦凡五上春官不售謁選得遠安令入境
首捐金新先師廟會 詔度天下民田遂一切覈實條畫上所部絜
爲令居遠安六年凡職事有便於民者一切破崖岸爲之在任有甘
霖瑞麥之應兩臺交章推轂而公僅得寶慶同知以去遠安之民如
失慈父母焉迨公爲寶慶郡多盜枹鼓數起公不爲深文株累弟夷
其魁酋而陰令各散其黨與會 珉宗人起大獄監司檄公往按之
公所以曉諭王得失者有烈士風竟平其獄值歲大祲公攝守篆條
畫便宜貧與錢病與藥饑與糜死與槥四境以內多所全活公自爲

遠安時一切苞苴筐篚不入比居府愈甚而前此屬邑有茶課諸寮
遞主之及公在事悉以羨歸之公諸寮人人自以爲不及也當是時
公居室不戒於火諸孤恚焉公移書曉之曰若祖所遺清白而父不
潰家聲卽災不失故吾孺子焉用戚戚也吾今亦不欲以七十之衰
年爲五斗折腰矣遂上書乞休不許公必決策歸歸則杜門足不踰
里閭再踰年以壽終年七十三公逮事誠菴公稱順孫至居東津公
喪也至性過人毀瘠幾比於不勝喪者遇兄弟怡怡如也宦裝蕭然
無長物然性好施予喜周人之急昏夜叩門無不應者卒之日知與
不知皆爲流涕公弱冠知名芥視一第乃竟偃蹇春官兩度臨民泣
政設施不暢厥懷臨終默默無一語似若賫志以歿者可勝惜哉

亞中大夫鹽運使瞻魯鮑公小傳

失名 出家乘

公諱孟英字惟醇姓鮑氏瞻魯其別號也曾祖大司空思菴先生
肅皇帝朝經濟名臣一傳任子綠野公未仕再傳郁林公仕撫州贈

運同公父也公髫年詳視緩步輒異羣兒既就外傳嗜學弗懈郁林公之生公也自以三世以來無幾人愛之甚然未嘗一日不以學也公弱冠入成均名傾六館以司空冢孫蒙蔭謁選例任京官公退然不勝銓司多其讓遂以判開封府省會轄州邑三十餘別駕雖無專城之寄而煩劇尤甚公才優盤錯迎刃立解案無留牘署祥符攝鄜城神君慈母譽頌交騰先是郡苦邊餉大戶被其役者費恆倍常賦倍蓰以上公至較若畫一而歲額不失又清小灘監兌之弊甦大戶三千餘家在鄆城邁疾夢神謂用烏梅飲如言病已往謁岳武穆廟恍如夢六載滿遷惠州同知惠僻在海隅適議清屯公履畝稽較有增田無苛賦軍民兩舒丞職清軍兼司海汛得以便宜行事而公不濫受民一詞比三年以攝郡職繇代覲時東土大饑朝議以爲萊州同知同繡衣往賑詒詞有曰爲朕救此一方朕不忘爾洵異數也至則親躡屬邑不動聲色而民悉沾實惠再滿當別膺擢父老

詣留者殆萬人

詔加運同職銜仍管萊州海防事東民咸喜時

口跳梁大司徒會計檄海運三十萬石下令招商無敢應者公條計

以海運不可推而招商不應不若以招商之數招土著之民俾稍沾

餘潤抵其加派之徵當道喜從之登萊嚮應踰年數足軍無脫巾公

之力也自筮仕迨今薦剡三十餘銓部以郡守擬公公以撫州公早

違祿養太恭人朝暮懽承脫郡在遐方將母不遑陳情疏三上部始

覆奏以公清克纘世才優濟時歷任有成方期領郡遽爾懸車加運

使銜以示優異奉 旨俞允公歸歲時伏臘率子婦躬拜堂下稱觴

上壽花時月夕偕孫男環遶膝前效舞斑斕滃瀟隨時供滋味必備見

古有夏清冬溫之事冬夜一聞足畏寒公解衣抱足於懷坐以待旦

司空先生亂久不蕃至公乃多男子三世指可百計丁卯春方祝萱

嵩未幾而太恭人病未幾而奪柩椁公將舉太恭人祔塋撫州公而

不及遽卒年僅六十二

建德教諭紫峯鮑公小傳

失名 出家乘

公諱恩宣字君寵別號紫峯寶慶二守龍台先生長子生而端慤大父東津公解組歸甚鍾愛之比東津公卽世公方齠齏哀毀如成人左司馬思菴先生少所許可一見嘆其聰慧稍長從龍台先生肄業主山嗜學不倦爲文章援筆立就郡守博羅何公尤加獎賞與許太傅羅中丞結社杲山公年甫十八歲丙寅督學耿天臺公校士補郡諸生嗣後每試必高等丙子廩學宮數奇不偶屢躋棘闈己酉郡貢於朝明年廷試又七年丁巳始謁選天官除松江府訓導雲間故才數公坐臯比正身範士一切以贄見者不以入曰吾甘吾首藉耳每課士詳加評閱戊午公所簡拔登第者七人秩滿遷建德教諭雲間士紳競製祠章爲贈歛邑戴侯建德人也未蒞任時與公往來無間及來宰歛邑公絕不干以私公在建德復三載郡邑大夫督學使者時加獎譽公引歸建人挽留不得歸而獨坐一樓手不釋卷年逾

八十偶患瘡疹漸染脾症伏牀幾半載日轉沉劇屬纊前二日呼諸子謂曰汝父砥礪名節自反可以無愧汝曹無墮家聲又謂王父母并汝母三喪未舉實吾遺恨汝等留意以慰我地下可耳越二日乃考終始公居尊人喪也年已及艾哀毀骨立仲弟捐館無嗣命以次兒繼其後所著古文詞純正典雅曰砭砭錄凡若干卷藏於家

鮑璞齋先生傳

沈德潛 稿士歸愚

昔與前輩鮑東臯先生譚謙亟稱其族弟次玉修門內行輕財好施與予心識之繼遊黃山道出箬嶺萬年見徑路平坦石梁修整土人指曰此鮑善人之蹟也詢善人姓氏以次玉對思回車訪之而次玉歿已九年矣今年春次玉仲子光純郵其考事實請予爲傳因悉其行尤詳先生諱兆瑞次玉其字號璞齋自少磊落不凡侍父漢臯客於楚中楚中故多火災相延以百于計舊有廣庇會儲資以恤災民久而弛先生力復之以是有慷慨名遐邇無不願交先生者先生亦

肯傾橐爲人盡武昌衛畢君失核積帑將被劾先生爲代償吳君某
構難先生陰出貲解釋新安有會館鄉人欲闢其前埠便行旅來告
先生先生曰吾豈厚於楚而薄於歙哉立應之更建義學造就邑之
子弟箬嶺要道萬年雁塔登雲諸石梁皆先生所興築也平生無意
仕宦每舉漢崔烈輸財致位三公其子鈞以爲銅臭曰吾肯貽後人
譏耶孝養太夫人春秋佳日采陔蘭潔晨羞率子婦起居上壽太夫
人年近百齡先生年逾七十猶依依若孺子遠近艷稱待友然諾必
踐毫髮不私初方君山企病亟囑其孤於先生先生既悉心撫養復
爲籌畫擴其業孤成立授之始終不怠昔人所謂死者復生生者不
媿先生有焉郡守魏公化麟聞先生賢禮致賓筵風勵鄉邑郡人僉
以爲允其歿也壽母尚存以不克終盡子職爲恨蓋棺後有老百姓
氏入哭而哀者可以覘先生素行矣生康熙庚戌十月十三日歿乾
隆辛酉八月廿七日享年七十有二太學生考授州同知

勅授儒林郎鄉飲正賓配方安人繼黃安人胡安人子光祺候選州
同知光純候選翰林院待詔光揆候選縣丞光融郡庠生女適汪世
麟方其柏吳基忠孫某曾孫某

贊曰原涉衣服車馬纔具專以振施貧窮赴人之急范叔孫周窮
濟急鄉曲貴其義行史傳稱之王戎自執牙籌晝夜會計常若不
足韋莊數米而炊秤薪而爨後世鄙焉荀子所以樂分施而恥積
藏也先生利濟爲懷揮千黃金不惜彼瘡於織音視朋友顛危里
閭患難漠然不動於心者聞其風可以媿矣

賜進士出身光祿大夫禮部尚書前
上書房行走

予告在籍食原品俸年家眷弟沈德潛拜撰

鮑質菴先生傳

龔學海 醇齋

君諱兆秀字俊民號質菴世爲新安蜀源人而義聲大著於楚吾楚

人也聞大冶縣有某聘婦未及娶豪強謀奪訟於官官據左證將直之而不知皆豪強之僞爲也是日鞠讞公庭左右環視者千百人聲息寂然彼豪強者方鼓吻掉舌而彼聘婦者反消阻俯首不勝畏罪千百人悉忿氣湧喉瀕於唇齒而又訥者凡數飯頃聽斷官將照筆判之矣鮑君忽突出大呼不可復曰非我有所不可蓋天有所不可也縷舉委曲盡發豪強之奸數其罪而屈之於是訟爲之定合邑大呼曰鮑君真義士遠近聞之稱爲鮑俠質菴隨父德成公遊楚往來楚中最久德成公卒於漢上質菴偕其伯氏仲氏扶櫬返徽迨迨千里驚濤拍天斷岸荒驛維舟而哭舟人爲之廢寢食者蓋累累焉失恃後供養老母終其身猶若孺子慕者母夫人年餘百齡質菴先五年卒卒時恨不獲終養至未瞑其目焉嗟乎質菴於本源之地如此其厚可知向之勇於義者推於孝也悌於昆者推於孝也撫羣從居鄉里和而毅者皆推於孝也其他乳遺嬰焚宿券戚里傳誦其美雖

累牘書之殆亦有所不能盡也吾聞之士生一世有一節寸長亦可

不朽而况多美哉獨惜吾今者無史職之任未能卽表質菴之行誼而上之朝廷是可爲太息也

論曰士之有至性者始有逸情水口曇花君家鄉里之佳景也石巉巖妨遊屐非一日矣君嘗大闢坦途俾霞外之客得以逍遙杖履其逸情又似靈運在永嘉云

賜進士出身內閣侍讀學士加三級年家眷弟龔學海拜撰

太學鮑梅峯傳

江權

越門

鮑太學生諱光鼎字子新別號梅峯邑之蜀源人七齡能句讀其王母方太君壽文後隨吾師葉草亭夫子遊吾師一見嘆曰鮑氏有子矣故梅峯亦以能詩文名梅峯性孝友慷慨好施與父客漢臯梅峯在家奉母甚謹母多疾牀第湯藥梅峯必躬親終母世未嘗遠出聞

父病不假裝束輕身赴楚凡二千里不數日得見父父爲之歡樂嘗以制舉業見賞識於大中丞魏公邑侯汪公待以國士梅峯謂此空言無實濟棄去不顧江子曰甚矣論人之難也世之爲文學者挾其庸惡陋劣之時文俯視一切諸凡不在博士弟子列者咸鄙爲不足指數然考其居家如秦人之耨鋤德色箕帚諄語者往往而是甚則朋友親戚往來饋問一視善承吾意者與之其餘則雖有疲癯殘疾憚獨鰥寡不一引手救也此豈孔顏書中所稱說宜如是者而其人自視以爲得意此而與梅峯較量得失分別高下必有能辨之者矣予然後益知梅峯之賢使得盡行其志而爲其所欲爲其必不負所學也審矣梅峯可不謂難矣哉予於梅峯爲同門友與之遊甚深其行已悉有法度弟病食不下咽及弟沒傷哭失聲所作斷雁詩凄苦不可讀拯人之難至以參活塗中不知誰何之人歲辛未邑凶饑梅峯竭其家之粟以賑爲里黨先晚年益嗜學所著有尺牘英光二十

卷命其子其昉其良藏於家沒之日晨起盥沐閉目吟誦如平時曰吾適有學也而卒嗚呼世俗所謂學也乃所謂不學者也梅峯之如是學也乃所謂真學者也君子之爲學也以實不以名其信然與其信然與

乾隆十九年首秋月十有一日

賜進士出身兵部武選清吏司主事加一級年家同研弟江權頓首拜撰

行狀

棠樾鮑氏三族宗譜卷之一百八十六

明故資善大夫南京戶部尚書三峯鮑公行狀

許國維楨文穆

尚書鮑三峯公者歙巖鎮人也諱道明字行之父曰榮芳母汪氏鮑之先出晉護軍中尉仲鎮新安遂家焉及宋處士昌孫乃自蜀源遷居巖鎮其後曰顯宗者生蘇安蘇安生榮芳號石崖公以義烈聞是為公父以公貴封兵科右給事中母汪封孺人公童時屹如巨人志不耽他伎唯日事誦讀屬文爾雅在郡學試輒先諸生嘉靖甲午以春秋舉鄉試第四戊戌舉進士授行人壬寅改戶科給事中具論事持大體不拾細故度可施行者而後言平生遂遂口不道人短至其論刺搏擊即豪貴弗憚也甲辰晉兵科右給事中虜犯延綏鎮撫諸臣所上功罪異狀勅公往勘時邊法久弛人狃姑息公至按虜所出入處論次其輕重法之一無所徇因疏蹂躪之後宜蠲逋發貯拊循其瘡痍又列上完要害厲將卒數事為百年固守計邊人賴焉

丙午轉左給事中尋陞刑科都給事中戊申出爲江西叅政嘗兼攝
數道事因不集歲苦積逋民旣困竭軍不得時給公乃推究弊端酌
時宜均轉輸著爲令軍民便之會憂去壬子起補山東奉

勅督儲所至有司嚴憚爭爲盡力卽素梗不可制無敢後期河南劇
寇施尚詔流劫旁省山東大震公募卒乘壘守要害盜偵有備不敢
犯境內以安甲寅晉浙江按察使釋冤繫除苛細諸循習宿弊一切
罷之島夷鼓噪薄會城焚北關城中戒嚴民從外號呼不得入公躬
厲矢石狗城上人夷稍稍引却開門入之所全活甚衆乙卯晉蜀右
轄蜀方多故重以採辦諸役因物立名日不暇給公爲節力緩征不
數月民歡若更生丙辰晉滇左轄會滇亦多故 上詔卽山鑄錢弛
鑛禁以業貧民而部使日來督通繼輓者道相屬也公計曰滇險而
陞卽如蝸濡不動自活外轉則內乾矣召計吏挈全滇土著賦會之
十五用自給十三給灌輸十二備旱毀佗不意諸所引息塞耗雜衆

議用之令旣具百說不能奪也終日嘿坐不語一人而事舉戊午公
行考績民遮道留之或白故事挾羨金以行叱弗納晉留都尹未逾
年以右副都御史巡撫貴州貴州民夷錯居因俗爲理故無積聚公
先以節約稍稍裒益其間問軍民所疾苦身自拊循之督捕官故以
所捕多寡爲殿最乃誣縛數十人爲盜公廉其非盜釋之釋者題木
主事公旦暮祝焉苗相攫失所佩印有司簿責之急苗洶洶自危公
曰奈何以一印故急苗而亂之使無噍類乎乃議請新印諸苗悅服
容山土酋韓甸首亂連其黨寇施秉公轉餉徵兵檄將討之激以大
義人人感奮殊死戰無不一當百斬首二伯餘級俘獲稱是又設奇
懸購未幾逆酋就禽 天子嘉其勞賜白金織衣或諷公注子弟名
戰籍中以徼功賞公曰吾子弟不閑弓馬奈何冒功故督撫歲上功
籍卒撫拾毛瑣以廕其子公所戡定數十年負險之酋而公固不肯
上功其謙讓不伐類如此辛酉晉大理卿尋改戶部侍郎無何陞南

京戶部尚書承兵燹之後國用方詘公悉心計覈帑藏節冗費清隱
弊督逋之使四出一切簿書期會皆公自裁積儲數倍往昔

天子以公勤慎方倚用公而公引疾乞骸骨既得請歸則杜門謝客
雖親識罕接焉刺謁不至公門時角巾別業第從一二侍者布衣徒
行田野氓有願觀鮑尚書者或指示之愕曰果尚書邪毋給我其儉
素朴茂蓋天性也公守己甚嚴人莫敢于以私歷官中外幾三十年
未嘗以辭色媚人事有不可卽至親無少徇然平生未嘗睚眦人人
亦無睚眦之者生弘治癸亥五月三日卒隆慶戊辰正月二十九日
得年六十有六配方封孺人子男四梁娶方檀娶方槐娶吳繼汪朴
娶汪女三適汪傳芳方尚本洪應勳孫男十七世濟世延世儒經濟
兼濟世霑弘濟世仁世臣世義尚禮
席生世爵尚智
席生世守世元世美世懋
世濟爲郡庠生女十三曾孫一同甫其婚姻皆名家公卒之歲其冬
天子詔有司致祭給葬具公子梁等乃撫公行事屬史國狀之史國

曰余雅聞三峯公未之面也或曰三峯公蓋溫溫者云以今觀之異
乎所聞公勘延綏保魯越鎮滇蜀貴陽乃其中有介然不可奪之志
焉豈與和光混俗委蛇浮沉有意阿時好以希遇合者等哉然公深
自韜抑歆然退讓無伐善無施勞故其閱鉅炳烺世靡得而言之所
謂鞠躬君子非邪

賜進士翰林院

國史檢討徵仕郎充

經筵官奉

勅纂脩

實錄眷晚生許國拜換

欲見殺壽孫赴告曰父老矣我願代死先君曰吾惟一子存宗祀幸勿殺吾願自死賊魁踣踏不忍羈縻之間風震林谷聞若騎軍至賊駭散父子俱得免亂定歸故里築室以居自後足跡不入城府布衣大帶徜徉泉石間而窮通不與焉至元癸巳五月壽孫蒙恩分敎郡庠方以竊祿便親爲喜不數日而先君竟受於疾醫藥不効病且革處分後事甚悉乃召家人與訣言訖而逝是爲二十四日也生嘉定癸未三月十三日年七十一孺人吳氏諱滿齋先生之孫先十三年卒子男一卽壽孫女三道柔適鄭同孫道輝適汪槐道貞適鄭可庶女一適方清孫男二周卿魯卿孫女一以甲午季冬丁卯營塋墓在邑之寧泰鄉下屋孺人祔孤不肖不敢稱道先德謹述其梗槩誌諸幽宮則終天之痛而辭有不能盡焉壽孫泣血再拜謹誌

先妣孺人吳氏壙誌

鮑壽孫

先妣姓吳氏諱滿吳氏居邑西忠鵠鄉之溪南爲歛著姓祖諱自中

號耨齋父諱起岩母夫人鄭氏先妣爲其季女及歸先君逮事君姑君舅以孝謹稱至若主分內事及於訓育子女悉有條法當景炎丙子兵變避地溪南倉皇奔竄時所在道梗壽孫從先君冒白刃由間道往求所止亂定迎侍歸故里先廬焚燬復構堂寢以居己卯忽感氣疾更兩醫不能治未疾之先往省鄭氏女留宿女夢人荷與疑迎鄭夫人及先妣者鄭夫人遽去且謂八月十五日先妣歸期也夢覺之明日鄭夫人凶問至及明年是日先妣卒年五十八生平寬慈深靜勤儉不懈未嘗妄費一錢或以窘匱告者必賙之雖輟衣與食不恪也婦德母儀刑于九族生嘉定癸未三月十三日先君諱宗岩前奏補武進校尉子男一卽壽孫女三長道柔適鄭同孫次道輝適汪槐道貞適鄭可庶女一適方清孫男二周卿魯卿周卿後伯氏孫女一又明年己丑十二月十六日辛卯奉神柩塋於邑之寧泰鄉下屋用述梗槩誌諸幽宮嗚呼終天之痛固有極矣壽孫泣血謹誌

有元封縣尹鮑先生墓誌銘

鄭玉子美師山

鮑先生既卒於亂兵鄉之善人相與語曰天於亂離之際善惡之報爽矣吾儕何所恃而無懼乎其孤同仁泣語余曰先人積善以遺子孫而不獲令終同仁之罪大矣萬死不足償責尚何言哉雖然先人之善行不可沒也乞序而銘之使先人之志得白於九原則世之爲善者尚有望於後世而無懼也按鮑氏世居郡城之西門二府君諱榮始遷棠樾至先生十世矣先生諱周字景文曾祖諱衡祖諱宗巖父諱壽孫嘗爲清泉鹽場管勾徽寶慶兩路儒學教授至元初與其父皆爲賊所執願相代死由是俱得免事載宋史先生早歲出爲伯父諱元孫後所後曾祖諱衍祖諱山先生性好謙和每卑以自牧居家庭間雖子弟進拜躬自荅之出遇童稚相與爲揖亦必盡恭謹無有慢易之容其際事物人或以言相侵先生若不聞或以勢相陵先生亦不較己而侵者陵者自負愧嘗有怙強罵道語及先生者或告

之先生笑曰彼非狂卽醉何與吾事聞者服其長者晨興焚香危坐取道經佛典默誦朗宣遇朔望本命日作伊蒲供齋僧道出錢米施貧乏妻父母死無子旣收葬之復爲置後雅愛吟詩尤工五七言律所爲詩號薈林集藏於家年五十自卜葬地於城南之葉有築宮其傍使道流守之名曰心田道院至正七年同仁爲郃武路泰寧縣尹法當封贈請於朝先生封從仕郎徽州路縣尹夫人贈宜人九年十有一月命下卽心田道院設醮三晝夜爲民祈福以報國恩時先生康強矍壽孫曾滿前鄉里榮之歌詩遠近傳誦十二年四月紅巾賊由饒入寇據城以守民陷賊者五踰月浙西道廉訪僉事合刺忽納督江浙之師自睦來討九月郡城乃復十有一月賊復寇休寧守郡沙不丁等棄城而遁適朝廷所差太府太監卓駐馬以所部屯湖州取道廣德寧國自績溪進攻寧國民周鎬周銘周鑑招集亡命謂之民義翼附官軍以爲聲勢軍抵郡城賊戰敗走民間賊

退相與攜持歸復故業周氏兄弟乘民不備分縱其徒四出擄掠燒民廬舍劫民財物牽民牛畜殺民老病幼弱數其耳鼻以爲功績於是年德如先生者亦遇害十有二月甲子也春秋八十有二子男二人長卽同仁次德臣先生卒孫男三人深浚淮曾孫男二人葆龍保銘曰

天道無知顛倒報施非天無知逢時亂離嗟惟先生曰攸好德胡不考終遭此惡逆身雖遭逆福在子孫欲知天道視其後昆

處士景曾先生鮑公壙誌

鮑元康 仲安

予鮑氏世居棠樾高祖諱衡曾祖諱宗岩有隱德祖諱壽孫嘗教授鄉郡生先君諱魯卿字景曾自幼孱弱九歲始能行及長穎悟過人讀書三行並下釋經不專訓詁能以辭外意曉解聽之令人灑然又能旁通天文地理之說少時誤服丹藥遂成痼疾醫者不能療乃究心醫書自視一身脈絡洞然制劑療之疾損八九嘗受親命取仕得

歛縣儒學教諭已而嘆曰吾負疾若此而俛仰於人何爲不若治吾家而適吾志耳逮其晚年田園雖充拓所以自奉者麤衣糲食而已唯待物一以忠厚曰所遺者先世之業以之供公上奉祭祀待賓客賑貧乏可也厚以自奉可乎由是所立所行悉可垂範宗黨法焉平生交游多偉人而與師山鄭先生甚契合所居伊邇中隔蒲亭山暇日二人命奴攜酒坐山之亭上盞簪爲樂嘗與極論天下形勢山川險易一一如指諸掌又言古今之治亂自三代而下以至於今無不中其肯綮師山深服其所論誦其抱有爲之才而惜乎其未試也孺人程氏故宋丞相吉國公元鳳之孫兩淮制置司幹辦公事述祖之女男一元康女二長適汪檉次適程璠孫男一任師公生前至元辛巳二月八日歿以後至元乙亥七月二十日享年五十有五至正己丑八月八日元康始克奉神柩塋於邑之上南仁愛鄉平原之山遂敢述梗槩刻石納之壙中不肖孤元康百拜泣血謹誌

鮑景曾墓誌銘

鄭玉 師山

景曾諱魯卿姓鮑氏幼負奇才讀書三行並下日記數千百言天文地理歷律度數無不研究尤精於兵法與神僊脩養之說遭世承平無以自效又無相知有勢力在位者相推挽以致其能喟然嘆曰施於有政是亦爲政吾將行之於家又何必天下乎乃治產積居曰他日苟有贏餘亦足以仁吾三族賙吾鄉里況子孫衣食給足可以安心於學讀書致用以自效於世猶吾得效也不猶愈於已乎其理財也以任人爲先不計其輸贏得失而卒享其利其買田也望原隰之高下知田畝之肥瘠嘗有瘠田人棄不治景曾厚價取之曰異時必爲良田又有厥土上上人爭欲得之者景曾棄不取曰數十年後遂爲磽确矣已而皆然其自病也知脈絡之受病曰某經病矣其飲藥也識藥性之寒溫曰藥至某經矣明日病愈至期而愈嗜書如飴雖家務叢雜手不釋卷其夜讀也每至雞鳴方就枕席曙色才分書聲

又聞於鄰壁矣其爲學也專以講明心法爲主而以修飾行義爲先其論人也則以識見高下爲格而不泥其成敗之迹田過千畝卽誠其子元康曰田不可復買矣賦重役繁反爲子孫之累供給在官日夕不暇又奚暇讀書明理以修其身乎吾將效鳴夷子皮之爲矣景曾世居歛之棠樾里與子居相望咫尺中有蒲亭之山常使跛奴載酒與子坐蒲亭山上論天下形勢山川險易若身履其地者幅員之大如指諸掌耳及言古今治亂自三代已下至於今日無不提其要領而中其肯綮使其見用於世其所立詎可量哉景曾生以至元十八年二月八日卒以後至元元年七月二十日塋以至正九年八月八日卒時年五十有五曾祖諱衡祖諱宗巖世號長者父諱壽孫嘗爲徽寶慶兩郡儒學教授方至元之變盜起里中教授君與其父皆爲賊所執父子願相代死賊猶豫未敢殺會風起林薄間賊疑官軍至皆走散父子俱得免人以爲慈孝之報至今稱慈孝鮑家娶同里

程氏丞相吉國文清公孫女男一人元康也先是景曾無恙時嘗愛平原山川之勝歲一過之謀卜塋所而莫宜其兆後予與元康按行其處指而異之元康拜曰此先君子之志也遂舉以塋焉且以銘請予素善景曾不忍使景曾無聞於世乃使元康買石太湖之上刻予辭以銘其墓後有式車下馬而過者曰此鮑景曾之墓也其或由吾銘也夫銘曰

平原之山公所盤旋平原之水公嘗濯焉山水之間遂爲公阡我作銘詩庶可有傳於千萬年

同知靜軒先生鮑公生塋志銘

朱

升

允升
楓林

歛有厚德君子曰靜軒鮑先生名同仁字國良中年豫自爲墓於鄰邑休寧之上山林旣而歷仕告老離亂間居每念其家世而循其平昔輒慨然曰噫嘻孰當爲吾志銘者乎其文當云何安得及吾之生而見之哉里小友朱升聞之曰志銘必出名筆我則不敢若其文當

云何則可得而擬之雖名筆不得易也蓋先生之世晉太康間自青齊來歛凡四遷而居棠樾里今十有一世矣先生讀書無不通明法律善蒙古字學自幼卽以立身顯親爲志泰定元年試蒙古翰林院授全州蒙古字學正考滿以湖廣省官保爲理問所譯史未幾借除昭平寨巡檢於例任回陞郡教以阿速衛官保薦主巢縣簿越三年實授將仕佐郎主南康縣簿越四年任滿謁選京師陞從仕郎邵武路泰寧縣尹時至正九年也旣上官卽請封父母於朝明年命下而先生顯親之願於是乎遂矣又明年代者至先生亟歸築別室養親以娛志裁一歲斲黃兵起郡邑破陷而考君以卒朝省不知也十六年授先生承仕郎同知會昌州先生喟然曰君恩厚矣而豈余心哉竟不出當是時天下大亂自荆湖東下郡邑與中朝隔絕歛之仕者不留中則越在閩海其歸然里居者先生一人而已人仰之如景星鳳凰先生唯自謙退若婦人孺子然蓋其性然也不唯其歸老爲

然雖歷仕皆然其在巢縣有訟八歲兒自縊視牒卽斥其誣既得實衆驚異之先生曰豈有八歲兒能自縊耶乃誣者之拙非我之明也南康地接蠻獠獠性愚而獷官稍侵之則拒命幸而獲之又乘勢擠之死地破家殺身欲自新無路用是之故雖賦其稅必官吏親至其地受其價錢爲之糴而輸之以爲常先生布以恩信或造其村落一僮二僕雞犬不驚辭謝其迎款者而拊摩其至公庭者舊風宿弊爲之一洗四方傳誦之先生曰獠亦人也我以人理待之耳有陳馬首者戶糧幾二百石支絕產蕩而戶額存里胥代輸不堪率多轉徙先生籍其田責業之者輸之弊除而逃者復像而祠先生先生曰糧出於田公事也烏用是爲奸人誘掠人出境以賣莫能禦者先生先致奸人而後署牒卽得其情還其人此風遂息人頌其能先生曰奸人相襲狡而巧不先獲而扼之使得宛轉伸縮徒爲逮及者病奸曷懲而息哉吾察之常情非鬼神也宰泰寧日邑有民陳麟者妻亡而贅

游氏經營至田百頃麟死無子陳游二氏訟累年而分其田先生至則立麟後而給之田民悅服而歌之先生曰此通義也孰不知哉他如天久不雨先生禱則雨市民陳家有鬼怪法師不能禁先生爲檄典祀怪卽止遠近尤神之先生以爲誠可格神正可卻邪一不以自歸其爲民便利事懇懇聞於上諄諄諭於下至自損貲力常情所不果而以爲當然有相訟者亟命兩造於庭須臾剖決吏胥幾無所用部使者亦不復至縣人稱其神明而先生未嘗自足也不唯其臨政閒居亦然先生歸鄉不知人之少與賤也其接物蒞下一以寬和爲本有不肖者使自消焉性慧巧無不能以稚歲孱弱多疾而誤於藥石也則用意針砭之術凡四末之受斜與夫癰疽疔治無不中貧不能致醫者日相接於門或終朝至具不遑食以所能爲分內事不自知其勞且辱也以教人無不竭唯曰勿利之而已先生之用心如此人皆知之而孰知其世德之有自來也哉會祖諱山忠厚人也年

壽邑鮑氏宗譜
四十而卽世祖諱元孫當杭都之季不仕而仁其鄉元孫無子從弟
壽以其長子周後之壽之父宗岩字傅叔嘗領進士舉於鄉宋末里
中盜起宗岩避山間賊得之縛之樹上將殺之壽拜請代父死宗岩
曰吾僅一子奉先祝願自死盜兩釋之事載宋史周嘗教諭於鄉邑
其精神心術形於詩者有薊林小藁人爭誦之世德始發於先生而
考君封從仕郎黟縣尹妣程妻吳皆贈宜人是皆河源之濫觴也不
唯其世德也妣爲宋季狀元程公應常之孫女妻爲徽州路府判吳
天衢先生之女皆儒宗宦裔動止有禮法以相夫子而衍其慶故先
生之子仲浚後其弟其伯深字源睿而晦通而專尊信師友有聞無
不行也鄉邦師範之伯之子頌已克樹立大經小學事理周悉爲歙
子弟稱首先生神清而氣柔骨聳而體癯旣爲壽康之相而家慶之
來未渠央也非厚德之應乎故旣擬其志文矣而系之銘詩曰
惟僑胙嬰札春秋之人倫趙岐尚古賢壽藏圖爲賓我觀昔人有

晉趙武身若不勝衣言若不出口劉昆在官火還虎走善政之應
以然爲偶今鮑靜翁謙退仁厚我薦二子爲壽藏友千萬世然乎
否

鮑叔和墓誌

俞振克成

公諱元鳳姓鮑氏字叔和歙西棠樾里人曾祖父諱慶雲嘗從外舅
提刑汪公應元習科舉業因再赴漕闈不偶遂絕意仕進晚年以學
行稱鄉里祖父諱珪考諱回早失怙長能立志恢先業紹復祖風娶
吳氏生四子公居第三自少有至性父母有命必敬聽處兄弟怡愉
無間言人以佳子弟稱之及長益敦敏能樹立理生業持門戶不貽
二親憂及考君卒所以事母氏者尤盡其心至壬辰兵亂母氏在堂
七十餘矣兄弟聚議攜家避兵公曰妻子骨肉固宜各保全然安養
母氏爲最大萬一有緩急爲子者不宜獨生隨其所在而致力焉可
也皆曰諾及寓劉村青山羣寇竊發白刃如林居民咸股慄公至夜

靜時默以母氏禱於天俟東方將曙遂裹糒糧先負母氏遠行深入巖穴間然後間行以求妻子至晚家衆始相會母氏且喜且泣曰吾兒捨妻子脫我於難天實知之吾心實知之及亂定還鄉葺先廬治舊業上下安之後公年六十二而終鄉人猶指其事以贊公之孝行而名譽有光焉娶采市孫氏配德無違年四十一卒無子少室鄭氏凡生五男一女男曰恂曰汪曰壽曰佑曰添女良適山泉汪鎖孫男四人恂汪等以其年十月望日葬公於廿三都地名大塘邊遷作丑山未向孺人孫氏祔乃先事詣子請曰吾父辱知於先生有年矣幸乞一言俾有以掩諸幽子謂公平居而謹其常處變而全其孝斯實衆之所與非獨可垂法子孫是誠有補於風化而可永傳於後也遂書其本末爲誌

鄉先生伯原山長鮑公墓誌銘

鄭忠以孝

伯原鮑先生中年時得佳城於績溪之漕渡而預營其室知己者夏

君子都嘗擬爲誌文以見先生之志其辭之確有不得而易者又二十年而先生卒其遺事蓋有未備者焉忠因先生與從叔祖師山府君有通家之好獲聞嘉言善行有年矣故於先生之卒旣匍匐往哭而於其塋也復因夏君之文而畢其說焉先生諱深伯原其字也曾祖

父元讀書種德世稱長者祖父周以子貴封從仕郎黟縣尹有鄉林

詩集父同仁由國語入仕官至承事郎同知會昌州事所至有奇致

疑至有刻石碑其去思者先生自少工詩能文年十六適承事公出

仕卽預家政從仕公素慈善人或易視疑有脫字生在侍旁每勃勃不平

及長輕財重義思以奮立嘗築畊讀堂於居之南招延儒碩日究孔

孟之道仁義禮智之實修齊治平之効由是學識大進行誼益高而

聲聞四達乃相與構師山書院以延四方學者先生受朝命爲山

長主領教事士類歸之旣而壬辰兵變與從叔南軒率義散財謀爲

保障復立社倉以濟里之貧乏及紅巾求師山急師山欲死之先生

冒刃賂諸若獲免時有羣小與族兄德潤素相弱疑至是父子俱以義被害復求其次子先生匿之得全其宗是年冬元軍再復郡城而從仕公年高畏寒樂於家居先生侍衛不少離去邏卒執先生詣轅門時同遭執者七人次第受戮皆愴惶失措及輪刃至先生先生論訴賊情及兄姪死難辭色慷慨主帥奇之在執下有汪達因得免俱留軍中詔以克復之計忽承事公亦被執而至遂并釋之南軒疾臨危執先生手以二子託之先生爲主其喪而經紀其家俾二子皆有成立師山死於忠義先生始終周旋無怠率諸生立神主於其令君之祠而歲祀之撫惜其孤甚勤時既康先生以家事付其子曰攜三曲黑杖芒鞋野服徜徉靈山間人呼之曰黑杖仙因以自號云先生美鬚髯對賓客則張髯熙笑飲少輒醉與人交不驕矜不崖岸表裡如一泊如也然其生也天姿高邁操履端方而能審時應變隨事立宜可謂有其才矣居亂離十餘年存孤卹寡大義炳如可謂有其德

矣鄉人賴其庇而沾惠者比比或有不知者亦無幾微見於言面可謂有其量矣嗚呼若先生者其可不於古君子中求耶古所謂鄉先生歿而可祭於社者其在斯乎先生生元至大辛亥十一月十八日卒以洪武丁巳十二月二十日葬以己未十月一日配洪氏諱淑清處家知大體內外咸服男一人頴任翰林修撰同知制誥轉耀州同知女一佛俱先卒孫男一相孫女一銘曰
是爲伯源先生之室兮行則多矣子孫其仰則兮

思齊鮑公墓誌銘

韓

忠

景賢
罔齋

士君子賦天性之良稟剛直之操豈必爵位崇高功業赫奕爲能垂範於後哉苟有一善成名之跡則足以垂範傳後而有不可泯者况又有善之多者乎若鮑君思齊其人也按鮑氏爲古歙巨族其初祖諱榮始居郡城之西後作別墅於棠樾能樹德勦業以垂後宗派繁衍遂爲鄉邑望君諱汪如思齊其字行政廿五本十一世府君鳳公

仲子出爲叔考山公後孝友克家有光前之志讀書博學識見甚敏作詩出意新奇人多傳誦 國初有司錄其賢將舉用之託疾不就混迹於商縱遊江湖間聲譽籍甚一日聞有邊儲之例募民上糧中鹽遂攜重貲抵雲南易米輸官其鹽照撥溫州南場支給時海寇侵掠禁阻商行數陳之有司不理君獨倡厥衆條奏於 朝始得通行會場分鹽數不敷留連累歲其已支者多爲船戶所竊事露彼陽服其罪曰償而陰懷險害及船回海道謀欲鑿漏沉溺君悚爾若有神使詰其變者因得脫害訴於官官爲覈實責限追償法當如律船戶亦甚窘計無所出君惻然曰寧人負我矧家母年高倚閭在望豈可以此重貽其憂乎遂白大義于官釋之船戶感悔云吾輩誠逆理罪譴何辭賴至仁得釋願公壽福延長子孫逢吉君時年五十餘矣自是歸隱家山不復遠出奉親之暇以禮義訓子姪增修田廬用廣儲積凶年民食不足貧急者賴之鄉人有悻戾不德者于君化服里訟

有辯爭未平者于君繩直晚年以齒德爲一族望衆尊其行誼稱爲一鄉善士嗟夫君無一命之貴而行善及物如此豈不甚可稱耶視彼有爵位而無一善可稱者豈不大有間耶若君者庶幾乎生無愧於心歿而得全歸之道者矣君生於有元至正丙戌二月廿三日卒於皇明永樂壬寅四月廿七日壽七旬有七娶程氏槐塘珍公之女綽有婦行甫二十七而卒二子家善敦善一女榮適巖鎮潘顯繼娶汪氏洪坑昌公之女淑惠慈仁恩愛無間壽六十七而卒二子承善萬善一女素適本邑下南葉村洪子賢孫男一十人君與程氏汪氏合葬於十一都下屋後山塘 丁山癸向
加未丑 於茲有年其子萬善恆以爲先人壙誌幸納諸幽宮日遠矣匪得君子一言爲發其潛德勒之貞石將何以示子孫傳不朽哉用是專令乃嗣曰倫曰燦持狀賫禮幣來汴請銘予與倫燦相知有舊不得辭乃爲之銘曰

維歛之山 秀而萃律 維歛之水 清而且激 曰惟隱君

鍾是美質 肫肫其仁 侃侃其直 韜晦弗彰 行誼可則
澤慶深長 子孫蕃息 我作墓銘 用表潛德 庶永其傳
百千萬億

尚敬墓碣銘

劉剛

溧水端智孝思持其友歛鮑尚政狀請曰尚敬產故家質粹如玉少
同事周石泉先生恪志聖賢之學凡性命之微理義之奧先生引而
不發欲其體驗尚敬躍然直造肯綮時智方朮孺雖不識其徑庭恆
畏而敬之又同游翰林學士朱公升之門尚敬志益銳學益峻務以
明體適用得公指授爲多智始能知尚敬愈嚴憚之前翰林學士待
制鄭公玉亦愛譽尚敬謹飭果敏嘗勗其志而勵其學學既劬而志
未及顯不幸以疾卒家智知尚敬者悲其齋志而歿姑撫榱槩奉子
爲銘歸其孤俾鐫墓門以慰尚敬不瞑之目予遂如孝思所請揭其
實而爲之銘尚敬世業儒曾大父嗣卿大父君原作茂父以仁皆隱

德弗耀配汪子一劬未冠女四皆幼尚敬生也則元至正丁酉三月
五日卒也則皇明洪武壬子四月廿二日明年癸丑十月九日塋歛
東城關葛塘山之原於乎人謂尚敬屢華樹蓄之豐鬱而未嘗必於
尚敬發之今已矣惡乎不悲銘曰

夢憂之天兮胡難謀予才奪年兮理幽淡苟聞道而死兮曷露衿
昔賢亦或天兮匪斯今金華縮剛撰

翰林國史院編修官雲間朱孟拜書

翰林學士承旨嘉議大夫知制誥兼修國史兼太子贊善大夫金華

宋濂篆

鮑母余孺人壙誌銘

鮑泰希止

予鮑氏子燦以其母孺人余氏既卒之三月銜哀錄孺人世疑行適
其宗人泰曰母斯見背願死贖身無期卜塋有日復袖出其父文芳
府君墓誌銘示曰母嘗于家聞子與燦講文詞析義理輒以爲喜至

見燦誦此銘則潛然泣下曰文不我婦人識吾自歸入門夙興夜寐與若父同持艱苦同服劬勞同理生業造有厥家聆其間所誌無亦詞過乎情而見君子其不有難然者又將奚庸信於後哉因竊語燦謂身後必得吾子銘葬足矣燦當此敢奉以告噫予豈忍銘孺人之葬耶抑豈忍沒孺人之行而不銘耶按余氏世居歙巖鎮處士仕德娶胡氏並有德量生孺人諱周性行端淑自幼曉暢女事長益操持簡重年十九歸奉舅姑爲新婦行最小於事卽能出向人前維時府君上視三兄經運各有成業撫己一未有立旣得孺人爲佐所志克遂已而衆皆莫及晚益積有餘裕齒德偕進爲宗族黨里尊府君長二歲先七年卒葬邑東方村之原銘則松江太守黃衡夫撰也孺人壽七十七卒成化七年九月二十一日葬與府君並壙其宅皆預築也子男四長倫次春次燦次珍皆幹蠱而倫通針砭術燦以孝稱成化二年孺人雙足患腫潰陷累月醫禱弗能療燦乃日伏膝下舐去

患毒而愈女二祥勉方植汪正其壻也孫男七光庭社昂社景光宇光祖光雄光美孫女四曾孫男振孫若嵩紀孫嗚呼若孺人今亡已夫是宜銘銘曰

莫邪于將 旣化並藏 封祝是固 萬古無疆 孝友錫類 來其而昌

明故處士鮑翁墓誌銘

陳琳

新安有誠孝君子處士鮑翁守愚以弘治壬戌四月三日終于歙西棠樾里第之正寢享年七十有二其孤光祖光輔暨其孫若芝具述其行實爲狀來汴請予銘其墓予向視學新安知翁名最早比叅汴政閱憲副空同李先生文集記誠孝堂道翁素履甚悉真誠孝人也銘奚容辭按狀翁諱燦字時明行邦七守愚其別號也先始祖榮公自宋時遷居棠樾曾祖叔和祖思齊父文芳世以文學孝行著稱其家乘可稽已母孺人余氏兄弟四人翁居三自少穎異讀書知大義

尤篤於孝敬晨夕奉父母起居定省甘旨之節未嘗一時敢懈甫弱冠幹父之蠱商遊吳楚汴宋間凡所得輕暖滫瀡之物必寄奉庭闈屬其內子色養惟謹而瞻雲愛日之念固不以遠離少替所至有孝愛名士大夫樂與爲友而汴之縉紳戚里尤推重焉遂鼓譽於周藩王王嘉之大書存愛扁其堂汴人咸稱爲鮑孝子云成化元年夏孺人患足疽膿血交攻醫藥弗効時翁適家居終日籲天願以身代乃吮去其毒足遂瘳人以爲孝感所致 孝廟初有進士袁翹纂修實錄錄其事於郡乘中安成劉內翰先生復扁其堂曰誠孝空同之記蓋紀其實也內翰名史空同天下士鮑孝子之稱予知其信今傳後無疑矣予又聞翁於族子姓恩以義或有過諭以善言咸怙怙媿服鄉人之貧者每捐貲濟之賴以舉火者恆數十家里有德公塘久堙翁率衆修築瀦水溉田而歲常稔人皆利之塾燬於回祿卽更置之爲延名師以訓鄉子弟咸知學焉治庚申歲歉奉 詔輸粟入

邊得冠帶榮其身郡有司嘉其行義鄉飲賓席首薦焉晚歲怡情邱壑值風日佳時率兄弟拉朋儕爲詩酒之會有寓興稿存於家是皆翁素履之善狀有足徵云配娶槐塘程氏繼娶仰村程氏子男三光宇槐塘出光祖光輔仰村出女一適江肇孫男九若芝若蘭若瑚若璫若葵若誠若愚若水象賢邑庠生女一適鄭仕曾孫男六嗣業嗣胤孝生孝嗣孝廉孝嗣女四尚幼宣德辛亥二月六日生屬續之日無疏戚遠邇咸有善人云亡孝子不祿之悼烏虜 聖朝以孝治天下凡以孝名者皆獲 褒勸而翁之孝章章如是聞有司嘗以請光祖且懇疏不已竟以例寢予不能不爲之一慨也爲之銘曰

永世篤孝 厥聞四馳 應沐旌典 曷其靳之 翁有令子

克致遐思 孝誠繼繼 流慶無涯 蘭芽滿前 食報之宜

式墓考德 視我銘詞

賜進士亞中大夫河南右叅政奉 勅督理糧儲前翰林庶吉士提

學御史莆田石峯陳琳撰

清逸鮑翁墓誌銘

王瓚

正德辛未十二月二十二日清逸鮑翁以壽終于家歛之士君子皆走哭郊野廛郭之氓同然嗟悼有涕洟者未幾計抵留都及汴凡知翁者罔間愚賢而嗟悼涕洟如其鄉郡焉且有爲歌詞以哀之者嗚呼翁何以獲此於人人哉翁諱珍字時瑩世爲棠樾鉅族其先有父子爭死賊難鄉人號慈孝鮑家大父思齊父文芳母余氏生四子翁其季也最所鍾愛少令農業比長商游於汴而以時省侍於家自悔前是失學爰廣儲書史稍暇輒覽觀涉獵其大義而於文公小學尤信嚮服行懼惟其弗似孝友恭懿風邁一語一動具有理短疑屏浮華崇儉朴聲色奇玩之物絕無所嗜其於冠婚喪祭恪率古禮每旦必肅衣冠致敬於先祠不信浮屠不事淫祀見人禳禱輒喻戒之曰敬鬼神而遠之可也作淑作慝祥災自以類應諛瀆奚爲生平重然

諾多義舉其排難解紛濟人危急如飢渴之於飲食江湖之間往往

疑講

聞其名或拔之於濟溺或生之於垂死或歸人之孤或白冤獄

而出人之命或築塘塢以利農或置義塚以瘞死而無所於歸者其詳見於蘇臺楊君謙凌川和振綱所爲友善義行兩傳悉實錄也友善者翁軒名且以自號其意以爲居鄉則友一鄉之善在江湖則友江湖之善寔翁所允蹈者當其時如江大參伯顯傅憲副商佐李兵部宗一諸名公並忘其勢位爲莫逆交屬有詔勸分翁輸粟賑邊

朝廷錫以簪紱之榮復其身逮幾

疑

者年不欲久旅於外一旦謝所

知徑歸汴縉紳送之者車蓋相屬有夷門別意詩卷傳於時旣其歸也闢園於所居之西構亭鑿池環蒔花木設琴書鼎案牀帷其中游焉息焉任意所適客至觴酒哦詩翛然物表也遂扁其亭曰清逸人復呼爲清逸翁且樹宗老會以會族人七十以上會者於是亭條具規約闔郡誦嘉之郡大夫歲行鄉飲延爲上賓所處書齋恆列筆硯

有所見聞隨事紀錄如野史者若干卷晚年於北山薰充楊梅坦預營壽藏時時遊嘯其中曰此全歸之宅也翁素善攝養及是患足氣醫弗效然對客端恭若無疾者瀕終一語不亂二子問所欲言曰天地遽廬也死生夜晝也所貴力於爲善以垂稱耳殆自謂而寓勉歎距生宣德癸丑八月二十四日享年七十有九配王氏有賢行相家於成子男二長光雄次光弼並善自立克肖其先女二長適吳緣芳次適程約孫男一若川孫女一曾孫女一光雄卜以正德八年十月十二日奉塋薰充翁所自營之兆詳撰事狀介其姻鄭宜述請余銘余嘗記翁義塚察識特核要之楫楫然躬爲善之寔甚篤施及物之惠甚勤誠其力之所能咸樂爲之故疑顯而縉紳譽其德微而途人懷其恩夫豈強飾於外所能臻哉斯亦足以銘矣銘曰

鮑望棠樾族華以遙慈孝植名今斯孔昭其繁如林孰爲其翹賢哉斯翁獨以德超匪爵而高匪祿而饒高弗自涅饒弗自有惟義

斯踐惟善斯友鉅公名宦疇弗我厚矧茲儔倫旣敦旣久拯急濟危直援以手如彼溺焚罔敢或後襟懷洞然不罣帷墻江湖之間有炳聲光殆老而旋肆杖於鄉續其義舉於遠裔芳屏跡塵途葆真林塘清逸有亭木喬草香雲侶風賓於焉相羊維皇有詔錫之簪裳維天申之畀以壽康其樹彌淑其存彌長薰充之原式寧爾藏

永嘉王瓚撰

明故恩授義官鄉飲大賓鮑以潛君墓誌銘

唐

臯

守之新巷

臯之宗盟汝州守君錫弟有女適棠樾鮑生學學以春秋補校官弟子今年卒業胄監僑居密邇恆相覲也一日過見齊衰累然詢知其大父以潛處士疾終於家是歲正德乙亥十月四日也臯曰噫耆德也不可作已又明年丁丑學卒業例陞之冢宰以需銓次將謁告南還間致其父指揮使君之命並奉狀以告孤不天先子奄忽棄養號

呼莫及苦痛奈何裏事且有期宜有誌石納諸幽隧伏惟哀其情衷而惠之誌且銘茲不朽矣時汝州挾計簿入覲爲申其請誼不容辭按狀處士諱光庭字以潛姓鮑氏歛棠樾人世以孝弟承家曾大父諱汪如字思齊博洽多聞長於吟詠大父諱萬善字文芳父諱倫字時憲號樂靜咸以行義重鄉曲母鄭氏賢淑有壺儀處士幼警悟嗜學拉族同志相講肄無倦書史通大義不拘拘訓詁愛護典籍有濟陽江祿風略見污損輒忿愠動詞色少弟觸禁獨不致讓母鄭氏問故則舉大舜誅凶愛弟之說以對母爲之喜弟天卒樂靜不欲勞以舉業甫冠攜之商邸以經史自隨聲色玩好汨如也樂靜喜卽命之事疑事焉審量廢舉經紀貨殖器使疏戚咸適可如是者將五十年貲益雄業益擴凡同事者亦各振於舊也晚歸築室橫塘號曰潛菴期終老焉樂靜習鍼砭之術有利濟於人處士日夕侍左右盡得其精以治疾亦往往應手愈未始責報尤急人之急憂人之憂有窘乏

者每爲之調卹其有忿爭者質之爲陳是非利害甚悉事多賴之以寢歲癸酉饒賊流劫郡境太守熊公召募義勇爲捍禦計處士率族子弟赴之時出所見以佐師及議給軍餉備見採納賊平郡邑賴以安迨壽七十仁峯汪君進之崆峒李君獻吉雅重處士皆爲之記頌又一年季夏疾作醫療卒不起距生正德乙丑八月十二日享年七十有一處士家殷富自奉甚儉約至養其親則極滋味終事塋祭皆以禮初婚時爲門帖以自警惟恐奪於情而衰於孝也復以保身須寡欲養志敢辭勞亦箴戒焉又常哀集先世善行遺文爲傳家錄求學士篁墩程先生中丞靜菴汪先生爲之序壽梓以藏修造先塋躬冒雨雪不少避延名師以教子若孫庭訓先之以勤儉曰不勤無以自立不儉無以自守又勉之以見一善行思體於身聞一善言思記於心皆格論也歲修陂堰浚溝澮以時蓄洩爲鄉人之利郡守學宮梓皇明文衡書每捐囊佐其費值歲再稔出粟賑濟有司義之奉例

予冠帶尤重其行郡邑延鄉飲賓配方氏有淑行子男二長松例授
指揮僉事次梅邑庠生女三西溪汪錡潭渡庠生黃誥岑山經元程
默其壻也孫男三長即可學太學生次可久次可教俱幼孫女二長
適子族子鼐次幼未字銘曰

孝慈碩宗亂維厥良學以蓄德匪吏而商仁施義趨於家於鄉實
繁爾祉澤引以長猗蔚崇岡鑾茲石章歷於百霜弗磨耿光

明累封副使贈通議大夫兵部右侍郎鄣山鮑公偕配淑人余

氏墓誌銘

汪尚寧 廷德

公諱光祖字克紹裔本神禹後妣姓至周以食采於鮑得氏晉護軍
中尉伸始來新安宋處士榮爲棠樾始祖自別祖宗嚴父子遇賊爭
死鄉以慈孝名八傳爲慶雲公至時明公世有聞人時明公生公公
少穎異如老成人長益莊嚴尚氣節每衣服危坐對妻子如賓鄉黨
裸裎處者見公避去諸母禱祠事戒勿令公知或相諍語聞公影跡

卽止好善如己出嚴於惡惡不少貸嘗曰勿求人知而求天知勿求
同俗而求同理予何容心哉善惡分明其稟然也孝愛出自天性事
時明公以終身慕時明公疾作晝夜嘔吐數十起公扶持彌月不解
帶無倦勞意居喪及卜塋盡哀敬居常以不及事母爲念值忌辰戚
容近初喪薦祭必親蒞始時明公吮母疽愈以孝行著守郡彭幸菴
公聞於朝適去任事多沮公馳京師三請未獲成命徬徨如無所歸
茹淡守約自貶者二十年有司舉鄉飲不赴後以季子思菴公初仕
封御史移書示之曰爾之子職雖盡我之情事未伸天地一罪人耳
何敢當封聞 勅命將臨恭奉堂上朝夕瞻仰而已思菴公瞿然不
自安與兄瑚璉謀復請下禮官議蒙 恩旌公意始解自謂吾可以
見先人里巷嘖嘖稱歎時明公孝行蓋棺數十年後天理方定公顯
揚先孝其苦志視時明公無愧矣公雅性儉素珍玩無所好絲帛雖
備不常御楮札雖微不妄費曰當知作者之艱縱有餘亦爲造物惜

然樂施與好周人急慕范文正公之爲人客遊汴歲饑當道者索客
客避而民益困公上策謂宜通商惠工禮致招來米乃輻輳賴以全
活者甚衆中州士夫咸奇公遊京師諸名公卿聽公談吐不羣咸折
節納交尤好讀書坐臥處散置古今圖史隨便披閱論古今得失能
胷中自出意見不爲儒先成案所障感興吟咏皆憂時善後之意不
苟作亦不拘時俗調京中旅寓客無慮數百多挾聲妓爲樂公獨閉
門對書冊雖未通仕籍經世之務歷歷如睹寓鄰有大中貴權傾一
時聞公行誼將援引爲傳奉官公辭人曰是求見不可得子何不往
公曰諾卽潛歸思菴公官御史時公見邸報朝議多激昂移書戒曰
吾讀史見韓魏公平居未見特異及至當大事決大疑屹然如山願
汝效之又曰居官盡職乃爲無忝所生朝夕奉養區區之孝耳可徵
思菴公之經濟有所本矣夫孝弟之德通於神明古有是言傳曰元
氣渾沌孝在其中天降芝草醴泉神龍賢才挺出詎不信哉公生平

立身多可槩見予嘗備屬吏于思菴公見其與三司論時事時曰子
先君曾言當若是云云公豈直一純雅隱君子哉故吾嘗謂思菴公
不出家而經綸之業已備不特其才賢然也然公之情事嬰其身不
忘其心愛親其大焉者其諸善行懿德皆本於因心之一念揚先德
而啓後賢固有本哉公號執齋晚年以時明公墓鄰鄆山朝夕往焉
人遂稱爲鄆山公與配淑人余氏齊眉壽考卒前一日步履通衢與
長老子弟言以風俗日薄爲慮且謂吾卽旦暮去若輩其思吾語卒
之日夙興謁家廟徘徊中庭至寢室謂淑人曰吾將歸矣子婦訝其
異請遺言公曰予何言平時言行無違足矣俄瞑目家人環哭公張
目呼曰無擾我復瞑目端坐而逝踰時手足無倚如生人嗚呼異哉
公生天順庚辰四月十一日歿嘉靖庚子九月十八日享年八十有
一以思菴公貴封文林郎御史中憲大夫雲南按察司副使贈通議
大夫兵部右侍郎余氏封孺人恭人三贈淑人云淑人巖鎮思睿公

長女諱時貞明敏通達婉順相資故公有所啓而德益進叅決機會
險阻備嘗故公雖多事而心日休泛應周詳上下咸協故公雖客遊
而無所顧慮卒嘉靖二十四年十二月五日距天順丁丑十一月十
八日之生享年八十有九伯子瑚娶槐川唐氏仲璉娶潭渡許氏義
烏知縣舜卿公女季象賢巡撫兼總督兩廣兵部右侍郎娶富場汪
氏孫男孝生孝廉瑚生孝嗣璉生孝友思菴公生孝生子獻績獻策
獻可獻旂孝廉子獻章孝嗣子獻書獻言生嗣書言俱府縣庠生孝
友子獻旌俱廕國子生思菴公貽子書曰辱吾子相愛且知深先君
先淑人墓誌未有名筆欲以勞吾子無吝寧於鄆山公誼忝通家子
且自弱冠聞鄉評贈炙公行誼又私淑公身教於思菴公愧非名筆
其奚庸辭乃爲之銘銘曰

立功本孝 鮑氏之先 慈孝爭命 里名斯傳 爲母吮疽

鄆山之前 不辱其親 今誰則賢 地下可見 煥然簡編

縱橫者人 有定者天 顧瞻周道 皇恩爛然 長楊蒼柏

蔭此千年

賜進士通議大夫都察院右副都御史巡撫江西提督汀贛等處軍

務竦川汪尚寧撰

明故恩授義官養和鮑公墓誌銘

賈詠

新安多鉅家而人率稱棠樾鮑氏蓋今昔名賢輩出若吾亡友養和
君尤其傑然者云養和諱光雄字以道別號養和山人世居歛慈孝
里系孝子元鳳公後也曾大父安素先生諱汪如博學善吟大父諱
萬善殷厚嚮義父清逸府君諱珍淳德雅行具載新安郡誌母碩人
王氏寔生君暨弟弼也君軀幹頎美至性純慤幼從家塾習聞禮讓
之教稍長動合矩矱見者識爲偉人鮑氏素擅吾汴大賈君克事事
挾貲抵汴懋遷玄纁織貝歲獲鉅息所在交覽名勝縉紳士無不重
者聲望四達皆知鮑君河洛汝潁之間因以字行至有爲賦嶽色河

聲詩冊傳於世清逸垂老歸隱於家君構園亭環峙奇花異卉四時
佳序讌會宗老於中斑斕歌咏以爲壽迨居二艱杜葦毀瘠祭塋
遵朱子家儀艱闕兄弟同居無隻語牴牾姻族鄰黨以寔殫告者施
子有加往代邱壟罹侵於狂齏君兄弟陟險櫛寒走愬巡撫官事直
乃止已而出金百鎰首立宗法所庇滋遠勿替又代后治赤坎至太
守山路里民稱便鮑氏故事詩書君右文上儒續麗門輝姪懋承初
藏書樓一時髦傑咸集君悉心講質纂成朱子實紀并校刻先正諸
書所聚名箋古帖不減鄴侯歐公其有功文獻類如此曩歲頻凶君
捐租蠲息後先如詔輸粟率幾千石三世並拜恩銜守臣禮勞其家
嘗值京師有中人猝至稱貸君厚遺之無德色頃渠登樞要使者載
道報君且諾官君及汲引子姪駿發功名之會以爲榮悉拒弗與通
友人空同李子貽書羨君曰慮遠識微於茲爲極予自承乏史館時
取道於汴得與識君衣冠禮度迥出流俗口不齒聲利而爲善最力

予故重之曰若果賈名而義行者耶自是皓首爲期千里問訊言言
必踐予故重之曰若果信以自勉者耶邇方典教南雍君數造予庸
展交游之思而遽已也天胡靳予友耶君年未及衰偶疾竟不起生
天順辛巳十一月四日卒正德丙子五月十六日年五十有六配潘
氏巖鎮名家有淑行子一若川娶西溪汪氏君卒越月權厝赤坎之
陽埃獲吉兆將啓而塋焉若川以予知舊走狀請銘義有不得辭者
爲之銘曰

士惟愛義利匪黷兮士惟愛信言匪易兮塵視銀黃而義斯孔彰
契合芝蘭而信胡忍忘歸寄有常瞑目奚傷終日賁厥藏

賜進士第朝議大夫南京國子監祭酒前翰林院編脩同脩 國史

友人穎川賈詠撰

維我祖考既卒之三十有八年不肖輩始克移厝就厥塋事非敢
緩也蓋有待也祖考配潘太孺人恭儉起家仁慈逮下令儀徽德

有光彤訓生前庚辰十月二十九日卒今壬子十一月五日享年九十有四茲合祖考塋於薰充之山墓負壬面丙同塋異壙叔祖考梅山公暨江太孺人舉偕塋焉從先志也墓誌係學士賈公名筆距今先君先妣及母張孺人俱先卒遺不肖輩二人可嘉娶稠墅汪氏繼閔氏羅氏可述娶溪南吳氏繼徐氏孫女四人長適唐世橋蔭補柳州府通判次適汪明復次適許一和次適鄭舜生曾孫男四人志達志遠志迪志通曾孫女二人俱幼不肖輩追思罔極謹備述後先行次具刻於誌石之末

攷孫女三適許立和四適鄭勝生二名有誤

梅山先生墓誌銘

李夢陽 獻吉 空同

嘉靖元年九月十五日梅山先生卒於汴邸李子聞之繞楹彷徨行曰前子造梅山猶見之謂病愈且起今死邪昨之暮其族子演倉皇來泣言買棺事予猶疑之乃今死邪於是趣駕往弔焉門有懸紙總帷在堂演也擗踊號於棺側李子返也食弗甘寢弗安也數日焉時

自念曰梅山梅山梅山姓鮑氏名弼字以忠歙縣人也年二十餘與

其兄鮑雄氏商於汴李子識焉商二十年餘矣無何數年不來李子問演鮑七奚不來也演曰父母兄三喪曰喪舉矣奚不來也曰七叔父四十四歲始有子而姪也一耳以是大係乎身家已又問鮑七何爲演曰理生飭行訓幼睦族玩編修藝課田省植八者焉已其久也內孚而外化之是故鄉人質平剖疑決謀丐益者必之焉故效良則芳標美規懿者必曰鮑梅山鮑梅山云正德十六年秋梅山子來李子見其體腴厚喜握其手曰梅山肥邪梅山笑曰吾能醫曰更奚能曰能形家者流曰更奚能曰能詩李子乃大詫喜拳其背曰汝吳下阿蒙耶別數年而能詩能醫能形家者流李子有貴客邀梅山客故豪酒梅山亦豪酒深觴細杯窮日落月梅山醉每據牀放歌厥聲悠揚而激烈已大笑觴客客亦大笑和歌醉歡李子則又拳其背曰久別汝汝能酒又善歌邪客初輕梅山於是則大器重之相結內明日

造梅山邱歛焉汴人有貴客欲其權於是多邀梅山梅山遂坐豪酒
病損脾今年夏患瘧李子往候之梅山起牀坐曰彌瘧幸愈第痰多
耳然業處分諸件令演辦酒食俟其起觴客別而還歛也先是梅山
作憶子詩曰吾兒屈指一載別他鄉回首長相思在抱兩週知數日
攜行三歲隨歌詩筵前與誰論賓主膝上爲我開鬚眉情偏憶汝老
更苦中夜難禁迴夢時李子因說曰君病無苦念家梅山曰諾諾不
數日而君蓋棺矣嗟梅山梅山又嘗作燈花詩秋燈何太喜一
焰發三葩擬報明朝信應先此夜花重重輝絳玉朶朶艷丹霞愛爾
真忘寐聞蛩忽憶家李子曰君詩佳頓如此梅山曰吾往與孫太白
觴於吳門江上酣歌弄月冥心頓會孫時有綿疾吾醫之立愈諺曰
盧醫不自醫誠自醫之黃岐鵲佗至今存可也嗟梅山梅山梅山叔
牙後也其居歛也號棠樾鮑氏趙宋時有遇賊而父子爭死者於是
所居里號慈孝里云梅山父鮑珍也珍父文芳文芳父思齊珍號清

逸高尚人也娶王氏生二子次者梅山梅山娶江氏生一男子二女
子男曰若渭今六歲矣梅山生成化甲午某月日距今嘉靖壬午得
年四十九而其櫬還也演實匍匐苦心以之還厥情猶子也以某年
月日葬某山之兆

銘曰崎嶇嶮巖人謂非險淵洞瀕洞猶謂之淺坦彼周行彼復而
迷桃李何言下自成蹊嗟鮑子胡不汝悲胡不汝思

北郡李慶陽撰

明故資善大夫南京戶部尚書三峯鮑公墓誌銘 汪道昆

今上二年春正月己卯南京戶部尚書鮑道明卒於家 上輟朝

諭祭葬如令甲有司舉葬事尚書子梁檀槐朴謁所親都察院右僉
都御史汪道昆爲志爲銘尚書公字行之歛巖鎮人也鄉人故多公
長者稱三峯先生云公父封兵科右給事中諱榮芳母封孺人出汪
氏弼治癸亥五月某干支公生端靖自如不受狎侮稍長受博士春

秋嘉靖甲午南海倫公茶陵張公出典南畿試事得士爲多公舉第
四人士譽歸公久矣戊戌舉進士授行人三歲進戶科給事中再歲
進左給事中尋進刑科都給事中當是時信州袁州爭政言者率揣
摩希望各中其驩其或浮慕骨鯁之名排擊紛起公獨正色中立或
以言責詰公公謝曰主德聖明臣愚不足以奉明詔如使株連毛
舉徒自託於直言臣雖愚不欲以此傷大體會御史奏延綏失事巡
撫都御史以捷聞先帝命兵科右給事中莅視之尋奉璽書往
公徧歷塞上閱虜出入諸鄣塞亡人畜多寡有差按軍府部署方略
較諸將程期論罪輕重覈首功虛實策賑濟防禦諸便宜議上當人
人心無枉撓聞者謂千鈞一發飲羽虎狼無問狸狴矣先是虜入上
谷公上言匈奴日伺邊必求再逞乃今易置宣大總制用翁萬達易
置本兵用唐龍萬達方撫關中不得代宜未卽至龍以終養去母在
宜未卽來假令稱兵其何以應倉卒按祖宗法宜大設總督軍儲

侍郎一人貳總制京師設提督團營尚書一人貳本兵分任事權相
表裏無事則戮力共濟有故則可攝而代之復之便當事者計非急
持兩端其後虜犯京師卒用公議公在近侍七年出入唯謹卽有不
測獨由由然應之袁州中信州先帝怒甚收信州及建議復河套
者併逮言官杖之廷公頓首曰臣固當答謹待罪出而參知江西政
事居頃之罪囚王連遣子叩闕上書誣執故都御史胡纘宗誹謗
故入大辟辭連刑科公以故刑科都給事中當就對簿先帝怒甚
人人自危公頓首曰臣固當誅謹待罪及事釋卒未嘗以喜愠示人
旣畢親喪補山東職如故大盜師尚詔起歸德趨山東公以部子弟
戍滕張武備甚具賊遂卻尋受禽公以保禦功賜金論賞進浙江按
察使蓋當輻輳之衝鄉人往來部中趾相錯部中權豪多關說不避
惠文公戒閤者毋入鄉人謁毋入關說者書卽權豪面謁欲有言曾
未得一開口旣又發臨安故給事中高時奸狀械送京師無何進四

川右布政使以採木論賞復賜金無何轉雲南左布政使時多徵發民將不堪公愀然曰滇卽小饒直蝸濡耳蝸不轉則活轉則中乾此誠藩大夫事乃會計全力什五自給什三轉輸什二備歲凶佗不意令旣布滇人至今便之己未入朝麾筦庫羨餘弗納尋進應天府府尹已復進都察院右副都御史巡撫貴州貴州夷部錯居故患盜殿最捕盜諸吏士視獲盜多寡爲差諸吏士或掩不辜求追簿責公遇文致不辜者立釋之阿堂攫印構兵楚蜀騷動公謂有苗視印爲向背請降新印令反側子自安母勤遠略爲也容山酋韓甸竊發公徵兵遣將討平之斬首二百有奇甸就縛先帝賜金幣下兵部論功人言歲終類奏功故事猶得任子今大捷宜視昔有加不然則籍子弟置有功部中亦得延賞公謝曰臣奉天子威德得罪人固諸將吏功臣何敢爲子孫地已進大理寺卿尋進戶部左侍郎賜金幣會袁州得罪去變置諸大臣公進南京戶部尚書蓋一歲三遷矣公乘

兵變後主度支體國撫軍不遺餘力尋以疾乞骸骨先帝優許之上卽位初廣厲言路諸大臣往往中多口唯公保身名完卽公無所瑕疵其決筴蚤矣家食五載跬步未嘗出戶庭茹淡服疏將令後世師吾儉公配方氏封孺人子男四人女三人孫男十五人女十三人曾孫一人門內不啻五千指承家一切務馴謹所謂得全全昌非邪會兵部左侍郎棠樾鮑公致仕歸公宗人也鄉人嚴事二鮑視漢司隸同乃若明哲保身則過之矣歲朔疾風自西北起占者以爲咎徵月將終兩公相繼卽世吁嗟嗟異哉往不佞從公上計京師公以讓名語不佞聞者莫不誦說語在著論中時執金吾使人饋公公出小錯刀勞使者客言執金吾有寵公卿大夫爭自下之今使者來母已薄公笑曰觚生視此不薄顧謂使者薄之乎公與人逶逶然必軌於正義此其大率也嗟乎公往矣上之則國史書庸下之則學士大夫誦義凡有心知耳目者莫不見聞不佞備在婚姻無能揚權萬一謹

撮其較著者內之坎中墓在宋村某向銘曰

奕奕大鄣篤生純良翼我先皇入侍承明言中國經邦之直臣

周旋四服澤流比屋施及殊俗用武黔中振若發蒙恂恂讓功

高帝舊都九州上腴作大司徒引身請老榮名自保宜爾壽考歲

時在龍吉士罹凶邦人改容帝心則恫乃命司空作爾立宮立宮

楚楚九原膺膺奕世昌阜

明故從仕郎膠州判官鮑君墓誌銘

方弘靜定之采山

君諱槐字子植別號懷峯志永思也歛之鮑自晉護軍仲以中尉鎮

新安家焉元處士昌孫由蜀源始居巖鎮六傳而封兵科右給事中

榮芳以義俠聞則君祖也父三峯公南戶部尚書尚書貧無貲而君

娶於谿南吳奩資甚盛乃以博士弟子肄業太學太學諸生慕其雅

飭無貴介習相與推重而琉球隸成均學者願師事君君固避曰吾

無以長遠人安可蹈孟氏所患人益知君遠度矣尚書之開府貴陽

也以伏暑行臚不豫君與仲兄從百方娛侍尚書公安焉初仕瑞安

簿主治賦明習吏事若素宦者鄉部例金卻無敢進民固知憚矣邑

有河病其斗直謀紆之君督鄉部長分植均作出俸錢市酒肉行勞

民感勸趨役六日而竣咸驚異焉邑獄訟不決者以移簿輒解聲名

出令上益謙慎自下推能於令以是上下皆賢之令上計薦君攝邑

事比還則夙逋盡完令籍以最遷去則屬新尹更相重也先是 詔

郡國度田未嘉麻氏恃荒逃不應役令不能問監司檄君按之君從

二三卒史歷險阻霖雨三日至於乏食安之無慍色豪者覘知君誠

信無意深治之遂出服罪君讓之為陳利害宣布德意與之更始乃

出所匿籍願輸額賦一如齊民感君更生焉君以他邑簿旬日完積

年案恐令慚白監司民無知令拊摩之且格是以易使也監司曰安

得長者言益稱之令感悅曰君如當盤錯寧後虞朝歌哉青田令聞

君賢觀時亦舉自代去則民擁錦障遮送留鞞寄思安得君為真令

君賢觀時亦舉自代去則民擁錦障遮送留鞞寄思安得君為真令

也邑豪劉囊者有罪捕數年不得君下片令立出所犯乃異殊死爲平之得減等囊圖像祝焉囊所以易出者自以久逋重令怒且斃杖下不則瘐獄中而信君持法平不以怒遷故出也君佐瑞安五年凡再署邑篆一奉臺檄以邑簿考郡邑治課薦剡屢矣而僅循調海寧丞海寧歲侵君奉檄發粟賦饑洞悉民隱積猾不得欺漁而寡人始蒙惠又損祿施藥全活衆矣邑南海塘蓄風潮壞數千丈度且役經年苦取石難君行視海門赭山石可採運以大舸作數月罷而海鹽塘壞亘十八里其役尤鉅水部檄海寧丞監作君令先作內壩無煩壅水省工力十倍大防外殺海波而引洩鹵水溉田其入畝鍾旁邑咸請畫作事 聞班賜尚方金五兩遷膠州判官州饑振之如海寧監司行州加獎尋改 蜀府護衛經歷乃倦遊解綬襍被蕭然也司詮氏第以例貢例改無壅選者而未曾上下其考能盡職不能援上已無尤哉君爲人通敏而精力兼人居無事未嘗自佚卽雕蟲小技過

目應手輒能精之專其藝者不能過也所至孳孳民事爲興講利便道中橋梁圯壞者輒勸修砥水泉可引溉者爲規畫儲畜以盡地利民知以佚道使而不擾咸易從之諸惠蹟不可勝紀歸田耆矣嘗以事遠行乃數千里而徒也余於君家世睦先太母贈夫人於君爲曾祖姑尚書配夫人爲余族姊氏余近屬弟尚本尚書愛甥年不末而素封業在淮揚者莫適爲督君以姊氏故身任之間歸葺尚書祠及坊竣復往素鮮疾微恙而逝年七十矣蓋其篤於親也生嘉靖乙未年三月晦日歿萬曆甲辰年六月十四日元配吳孺人布政使司經歷一龍女繼汪處士鉉女並先卒子男四人世延吳出世臣世爵世功汪出世延娶汪氏兵部左侍郎公道昆女世臣凡三娶鄭氏處士樟女方氏處士舜謨女並卒最後吳氏處士正榮女世爵娶潘氏處士高年女世功娶胡氏處士士熹女夫婦並卒女四人長壻太學生吳如德次鄭煥暘次余洙次趙善教長吳出其三汪出孫男八人士

麟士忠士驥士驤士驪士惠士驃士德孫女四人曾孫男二人景醇
景先世延等奉櫬權厝環山先墓之次余豫爲誌以俟吉卜銘曰

士修身見於世奚必中式仕敬事後其食奚必顯秩三仕可已孰
察其績其績不忘無入非適不見子范子居越而霸居陶而殖吾
以銘君之幽室

正議大夫資治尹前南京戶部右侍郎里人方弼靜謨時年八十有

鮑鍾公偕大誌公暨配洪太君墓誌銘

李世倬

穀齋

曩余視湖北藩政以公餘接見歛鮑君次玉恂恂長者也越數年其
子景熙審端猶子治南自楚歸將營葬其十六世祖並高祖爰束書
具顛末請誌於余蓋次玉已前歿數年矣余重其誼弗固辭按熙等
十六世祖諱鍾字宣之爲大誌公高祖大誌公字求吾則又熙等之
高祖也自始祖居仁公依母墓遷蜀源子孫遂家焉世多潛德至鍾
公少偕其弟鈔任萬石長傲社倉法時其糴糶世皆知公爲可與有

爲者也長而操蒞江右佐父起家聲譽籍籍江淮間友愛諸弟甘苦
與其於宗族特加敬讓交遊間厚施薄望未服艾卒於九江逆旅大
誌公繼起卽鍾公玄孫爲文耀公次子先是文耀常以耆德著於鄉
賜冠服公秉家教與人一以仁恕或以橫逆加者釋弗較閭里懷其
德配洪氏稱壺範者必以爲宗子嘗聞景熙之言曰吾鮑氏中微遠
祖尚厝淺土爲先人未竟之憂余與弟治南審端廢寢食者屢矣幸
舉二百年來待塋之棺得吉穴于西鳳凰金盤形余鮑氏或再以陰
德而再興也熙等又稟命於其叔漢白振羽兄介維子新以成是舉
殆所謂有善必公者鍾公生明成化己丑七月三日卒明正德辛未
九月十五日年四十有三大誌公生明萬曆乙酉七月五日卒明崇
禎己卯九月一日年五十有五孺人生明萬曆丁亥六月廿四日卒
康熙丁巳六月六日享年九十有一子爲景熙誌如此子蓋知其意
有所誌無非以誌前人之所誌故予可得而誌也時乾隆癸亥某月

某日熙等奉鍾公柩移葬茲山大誌公與其配洪孺人祔葬焉爰爲之銘銘曰

西山之陽厥名鳳凰金盤秀列佳氣鬱蒼輦茲幽宅終焉允藏庇爾後嗣百世其昌永揚徽烈食報無疆

太常寺正卿年家侍生古燕李世倬拜撰

儒林郎鄉飲正賓鮑璞齋先生權厝誌

蔣溥恆軒

自古高獨行之士漢之東一時處士依仁蹈義至性過人三代以下風俗之美無過於東京者蓋光武明章數世爲之以至於此此子於鮑君璞齋不可以不誌也璞齋生而有異質幼卽侍父客楚地以才識爲當時大人所器父卒事母孝與兄弟友愛母春秋高左右就養不離油油若孺子而平日又疎於財急人險艱不遺餘力有方某病篤以藐孤托璞齋應諾果終不負所託武昌衛某積帑虧賴璞齋爲代償又吳某構難陰力爲解得脫於楚地行利益人事尤多如復廣

庇會以恤火災闢新安會館前埠以便行旅此其犖犖大者在鄉則修太尉殿及萬年石梁箬嶺要道於其里則捐建登雲石梁新宗祠水口黨媼雖疎遠無不恤也嗚呼俗之壞久矣自學士大夫無不捨仁義惜財利况其下者乎初璞齋爲甘泉余茁邨所知一時當路爭譽其賢時亦慨然自以爲當得意已而沉淪高尚徜徉於山林泉石之中旣老矣猶爲清介郡守一山魏先生所賓禮嗚呼此所以爲璞齋也使其無有清脩孝弟之見於前亦無以見禮於此矣璞齋卒之日有不白姓名而來哭者至於今知與不知無不交口稱賢則處士之傳豈獨漢之東京獨多於後世而爲國家崇獎節義者又何不可於此樹之風聲以移風而易俗耶公姓鮑氏諱兆瑞字次玉璞齋其號也父德成世爲歙之蜀源人公生康熙庚戌十月十三日卒乾隆辛酉八月廿七日享年七十有二太學生考授州同知

勅授儒林郎鄉飲正賓以己封贈先世元配方安人靈山方逢聖

公女繼配安人黃氏下市黃文灼公次女俱先公卒繼配安人胡氏
路口胡豐祖公長女皆以賢克儷君德子四光祺太學生候選州同
方安人出光純太學生候選翰林院待詔黃安人出光揆太學生即
用縣丞光融郡庠生俱胡安人出女三一適大里汪世麟青年矢志
奉 旌建坊方安人出一適靈山候選布政司理問方其柏黃安人
出一適澄塘吳基忠胡安人出先公卒孫幾人曾孫幾人黃安人葬
楓樹林今偕方安人仝厝權厝蜀口待吉卜扞公先厝獅山今改厝
以公狀來乞予誌者公仲子今翰林待詔景熙與子夙以文字交者
也

賜進士出身經筵講官吏部左侍郎世襲一等輕車都尉年家眷弟
蔣溥拜撰

蜀源質菴鮑公權厝誌

陳大受 可齋

子弟姻江念功爲蜀源鮑公快壻一日鮑公之子光鼎等以若父行

畧因念功請誌於予余素善念功得聞鮑公事最悉又重以姻義弗
獲辭公諱兆秀字俊民又號質菴家蜀源在其邑之西羣山環其外
一水縈其前鮑氏世居之質菴少負奇逸之姿治生有贏餘卽以急
人之難大義轟轟以用其財爲適於義嘗行道見有遺孩幾瀕於
死出金召人爲乳母乳之生焉又好以財貸人視所假貸者不能償
卽焚其券客楚大冶縣有某貧而孺聘婦業有成盟有豪強起而與
爭邑令幾爲所惑都人士畏豪焰莫敢撓公義形於色力白其事懦
者得完伉儷晚厭世事樂其鄉之山水臨風嘯味徜徉自適其鄉水
口曇花發依山瞰流上下輝映人望見公於其間蕭然有凌雲之意
初不似塵世間人公爲人孝友公父卽德成公宗族所稱孝子者也
卒於漢邸公哀毀孺慕終身不怠人謂孝子之後常生孝子信矣公
生康熙辛酉年正月二十日卒乾隆戊午年六月七日享年五十有
八大學生元配許氏早逝無出繼配程氏槐塘程起明公三女性賢

孝刲股療母先公卒繼配李氏漢陽人青年矢志撫子成立子四光
鼎太學生光旬歲貢生光績內閣供士先公卒程孺人出光猷李孺
人出女二一適江村兵馬司指揮諱禹治卽子弟姻江念功也程出
一許字槐塘程未嫁卒李出孫五人茲奉公柩權厝於里之楓樹林
待吉偕厥配合扞焉予撫公之大畧見公之源遠流長後世儁材之
代出宜爾也嗚呼其可誌也已

賜進士出身吏部右侍郎前禮部侍郎

欽命浙江典試加二級年家眷弟陳大受拜撰

兆秀公於乾隆二十四年以孫樹芳請封

馳贈中憲大夫配許氏

馳贈恭人程氏

馳贈恭人李氏

馳贈恭人

鮑太學梅峯姻先生權厝誌

江登雲 舒青

鮑太學令子字如李者爲余伯兄館甥因得交其尊人梅峯先生每
相見未嘗不傾心也後余典禁衛不獲時相握手而公旋棄世訃至
感喟不勝隨以侄倩如李述公狀郵書京師以公將權厝來請誌余
謂權厝非古也古大夫三月而塋士踰月而塋棹周於棺土周於椁
反壤封加樹於其上或曰觀其封可知位之崇卑觀其樹可知德之
厚薄所以使後世子孫之識之也後世之所謂權厝曷爲者也梅峯
先生生而穎悟七歲授以王母方太君壽文能成誦比長從名師學
詩文日饒自謂於心性之理尤明一見知於大中丞魏公及邑侯汪
公咸待以國士人以功名期之梅峯不屑也家居事父母一以養志
爲務母善病左右無寧刻父客楚地患喘去家千餘里先生以數日
奔往問候起居兄弟怡怡其三弟邁病楚非公聞之食爲不甘弟卒
哭失聲作斷雁詩十章情辭淒切篤於孝友而去利若熱嗜義若渴

辛未歲歉公首捐彙集同志易粟以賑嘗以人參活塗人塗之人誦
焉晚尤嗜學選諸家名東二十餘卷廣爲輯註題曰尺牘英光嘗論
心性之旨曰盡其心者知其性也如過墓則生哀入廟則思敬哀敬
心也而所以哀敬處則性也由一端而擴之以至於萬善盡其心也
而實有以見此理之與生而俱來則知其性也易簣之頃神色不亂
猶以爲適有學也公家邑之蜀源諱光鼎字子新梅峯其別號也生
康熙壬午閏六月十六日卒乾隆甲戌四月廿八日享年五十有三
太學生配孺人程氏東山程力仁公女善持家躬操作寒暑不怠公
廣購書貲或不給輒質以應子二其昉其良昉卽如李醇謹象賢其
奉公舉權厝於唐模鮑宅冲待吉卜葬雖古禮之變而過於審慎不
敢拘三月踰月之說而輕於一葬以爲嘗試亦亡於禮者之禮也
賜進士出身

御前侍衛年家姻弟江登雲頓首拜撰

棠樾鮑氏三族宗譜卷之一百八十七

墓表

鮑仲安墓表

鄭玉

師山

仲安諱元康子友鮑景曾之子也予與景曾交時仲安方讀書家塾
未嘗與人接予又以負薪之役奔走四方不遑家居故仲安未予識
然仲安勤於讀書自經籍外諸子諸史以及山經地志岐黃醫書孫
吳兵法與夫佛氏經典神仙家延年長生之說無不研究而尤以修
飾行誼爲先及予終養優游林壑以故人子弟來從問學一見卽曰
前所學者皆誤也吾今而後得聞聖賢之正學矣於是日從事於五
經四書而尤盡心於易日讀一卦周而復始玩索有得輒筆記之且
曰上下繫辭夫子所以翼易程朱之說嚴謹簡略蓋引而不發學者
宜盡心玩味使與六十四卦三百八十四爻相出入字字有所歸宿
方爲有得嘗語人曰自吾從先生游於體認道理識所謂活潑潑者

於應事處變得經權之說焉景曾晚年仲安尚在幼冲已能出其智謀佐其家政及景曾大故仲安既除喪卽曰先人勤苦起家蓋欲積有餘以及人况聚而能散禮經之善教也元康敢不力乃以其歲所入十分爲率三分以贍老幼與凡家用三分以供公上貢賦及官府百費二分積蓄以待水旱一分賑恤族黨姻戚鄉鄰自親及疎各有等差又一分貯之別所以待親友之有患難者隨其輕重量力周之遣嫁孤女收養孤子義之所在知無不爲休寧有務官以虧課糶二女陷娼家百計求贖之使復爲良設立社倉時其出納以濟里社之貧乏弛其息不取又嘗欲置坊局儲善藥以救疾病爲不樂善者所沮朱文公舊有祭田百畝爲族人之無藉者所盜賣 朝廷旣立文公之廟於婺源訟之有司數年不得決官民交相詬病景曾嘗語仲安曰他日稍有贏餘當以其價予民而歸其田於廟至是仲安追思景曾之語粥其材木之山得錢爲中統鈔者一萬五千餘緡而文公

之祭田始復其他濟人利物之事累數之不能終事母程夫人尤孝謹求新鮮於山澤取珍異於蘇杭時其食飲體其溫清無不得其志焉至正十有二年二月紅巾賊至饒州仲安與鄉人集丁壯結保甲捐財出粟以供費用及賊至婺源知官軍皆敗走度民力不可支乃籍鄉里之貧者計口給粟使攜老幼入山逃避四月郡城陷賊購余甚急余將死之仲安謀於諸生曰家破可以再營先生死豈可復得吾將傾家以解是難乃使其從子深與吾弟璉以計行賕諸賊余始得免九月大軍克復仲安與深璉首起義兵應之出入山谷勞苦成疾病且革謔語唯云殺賊十一月十日卒年四十有四吾邑之人遠者奔赴近者巷哭皆如喪其親戚骨肉焉余使深主喪事是月二十日出仲安之柩於外以待卜葬越三日賊復至家遂燬焉柩獨無恙人以爲積善之報仲安天資高卓識見過人自其幼時爲學已與流俗不類及從予遊講貫益精踐履益篤乃率同門爲余築師山書院

聚學者而肄習焉余方將以講授之事屬之仲安仲安亦將有不得
辭者而遽死也豈天喪予乎天喪予乎乃敘其槩槩立表墓上以識
予之所深痛云

至正十五年歲在乙未十一月

明資善大夫南京戶部尚書三峯鮑公墓表

汪以時

太易

歛先正三峯鮑公諱道明事 肅皇帝積紀晚以計相鎮南國爲重
臣去之四十年所而學士大夫誦嘍盛德猶一日也往余館巖鎮習
公名迹於是叔子槐佐邑能職諸孫文學食貧竊嘆賢之比余被命
按河東過其里則叔子倅州告歸請余表公墓石觀以三文則故太
師文定李公故太傅文穆許公故左司馬南明汪公所爲碑銘狀志
也夫尚書公德懿三鉅公張之盡矣不佞立在下風何以稱焉則敬
表曰嗚呼有明尚書三峯鮑公之墓而因撫三公緒語綴次下方鮑
氏家歛自晉護軍中尉伸始其徙巖鎮自宋處士昌孫始五傳而諱

榮芳者封兵科右給事中是爲公父公起家嘉靖戊戌進士除大行
擢給事戶科歷兵刑三諫垣兩叅江西山東藩政按察浙江調四川
右布政使換雲南左使尹應天以右副都御史開府貴陽改南大理
寺卿拜戶部左侍郎晉南戶部尚書再疏得致仕其始右兵科也奉
璽書按上郡中虜狀法守臣申軍政不撓振廩起瘡痍大著威惠

叅藩長憲周部楚浙齊魯助興扞寇鉏豪貸枉有大造於東人其撫
貴陽假阿堂以不治速韓甸以必誅弛張異宜二方竝輯 而默與
敘廕不列首功尤古人持後留餘盛節暨登上卿主計南國當驕戍
逆節之餘鎮以靜重焦勞規畫不半歲而儲峙充饒時方殷賴而公
病歸矣公歸剗跡城府養病家巷衣冠質朴與鄉人雜處不存崖異
爲人溫外毅中襟識宏遠臨事持重不可奪以利害嘗坐非意株引
杖逮 闕下須臾生死公不爲動曰是無奈命何其雅自信確云爾
故於出處顯晦莫之自致無所庸心配夫人方氏前從右司諫受封

猶稱孺人公安淑媛終身不置媵貳有男子四人孫男子十七人竝篤謹有父風閭里與偕恂恂抑抑不問可知其爲尚書公後也汪伯子曰漢世美萬石君馴行不言而躬行蓋以身教也余未事鮑公聞其庭訓慈簡而後世式象醇德儻所謂身教非耶子孫清約不逮建慶貴顯然公繇侍中試理郡國澤在烝人勳閎爛著卽萬石非所擬矣公卒隆慶戊辰有 詔司空錫塋守臣臨祭夫人同藏余特表公墓昭 國典也謹詮次其大端如曰不朽則有三君子之言在賜進士出身文林郎巡按山西監察御史前奉 勅督理河東鹽課眷晚生汪以時拜撰

鮑恩錫公偕配吳孺人伯子德成公墓表

于岳阮爾詢

新安歙邑余之舊冢也邑之西鄉蜀源有鮑公惟承及其伯子德成以孝友世其家余嘗一爲文壽德成之偶方孺人故於其父子間事尤悉一日其子兆衍兆瑞兆秀等卜地塋塋衍命仲弟瑞圃階前泣

謂余曰吾父權厝王父母近地歲時拜掃吾父輒涕出以未覓吉壤爲憾茲奉王父母柩塋汪金嶺之焦家那並奉父柩附焉遵遺命也敢請大君子一言以垂不朽余誼弗敢辭謹按狀公諱恩錫字惟承父大誌公潔己好修家故窘賴公區畫經營事親養志由是親遂其養同堂尊幼咸取給焉後遭族之橫逆不克寧居尋卒於大梁配吳太君澄塘吳惟善公女嫻內則舅歿事姑尤謹命其子德成服賈於外德成公性孝友痛父卒於客邸也哀毀骨立走數千里扶櫬歸事王母母愛且敬母病侍湯藥日夜扶持親浣廁膾衣不解帶十餘月前史有孝友傳而後世巖壑山林之中能孝友而沒沒者多矣德成雖隱於賈然能承父志嘗舉其親派無嗣之未歸窀穸者塋二十餘棺又嘗集同堂耆功之親膳養之無缺禮嗚呼堯舜之道孝弟而已鮑氏世居邑西僻壤而能父子孝友世德相承以此生堯舜之世爲堯舜之民無愧也予世家於歙而濫官於朝見兆瑞之來殆於去國

數日見其所知而喜者及聞其父祖兩世遺行不獲去諸心亦且如昆弟親戚之日罄歎於吾側也聞德成公於書無所不讀居鄉建雁塔德安石梁尤念切烝嘗捐金襄置祀田此皆其餘行不勝述惟承公卒康熙壬子五月三日距其生明萬曆乙卯九月廿四日享年五十有八配吳氏生明萬曆乙卯五月廿二日卒康熙庚申十月十四日享年六十有六合葬茲嶺西山卯之陽德成公生明崇禎丙子八月廿一日於康熙丙子四月廿四日先以疾卒漢臯館舍享年六十有一祔塋墓右子姓婚嫁悉載家乘茲不贅惟公兩世孝友善行每使人感嘆而不能忘後之覩斯表者孝弟之心可以油然而生矣賜進士出身通奉大夫工部左侍郎年家眷侍生阮爾詢拜撰

恩錫公於雍正十三年以孫兆瑞請封

贈儒林郎候選州同配吳氏

贈安人德成公

贈儒林郎候選州同配方氏

封安人

恩旌百歲

棠樾鮑氏三族宗譜卷之一百八十七

神道

明資善大夫南京戶部尚書二峯鮑公神道碑銘 李春芳

公諱道明字行之新安歙人也鮑系本上黨叔牙世卿齊食采受氏漢著令宗晉護軍仲以中尉鎮新安卽官爲家新安始有鮑氏乃後繁歛棊置邑中宋處士昌孫繇蜀源徙巖鎮處士又三傳至顯宗顯宗傳蘇安蘇安傳榮芳則公父也封兵科右給事中封公多奇節以義俠聞國中配汪氏封孺人是生公新安故以春秋名家公業春秋廩學官顓志程書無他嗜爲制義陶鎔經傳醞藉醇深粹然一出於正類其爲人嘉靖甲午魁南都戊戌舉進士授行人滿秩選戶科給事中轉右兵科而疑會延綏中口撫鎮以訊馘獻功御史論其失律先帝勅兵科泣質異同當是時戎備稍弛虜張每盜邊飽所欲去諸將躡得老弱遺重輒以捷聞弊從來久公奉 璽書歷寧塞諸堡按

虜所繇入登吏民雜驗言鏖鋒者或未見虜稱遠覆者顧誤近援諸
匿亡失詐首功干軍正者悉論如法民刻虜羸餓開廩賑之別上完
要害厲將卒數事竝著爲令先是職諫垣者多乘瑕隙釣奇公意不
屑至用倉猝按邊萬里如見所畫便宜書滿公車觀者允服調左給
事中俄晉刑科都給事中出叅江西藩政軍民蠹利次第罷興纍臣
王連告故中丞誹謗燒枉不辜竝構故刑科擁闕棘聽 先帝怒甚
株逮辭染者數十餘人或弔公不測公夷然曰臣職駁謬刺姦死職
其所也竟得釋歸丁內外艱再補山東叅政軍益乏與其治視江西
益辦流賊師尚詔起碭轉掠東南所在殘毀獨公庀武整嚴所部安
堵優蒙勞賞擢浙江按察使至則出冤繫發鉅姦杜公私請謁無所
避回倭奴寇竝海郡邑火北關武林之乳鬪不啟外民投命無所公
登陴視賊未逼急收民入保免於鯨鯢進四川右布政使會作三殿
須材以勤職受褻調雲南左使滇弛鑛禁卽山鑄錢使日月至公曰

益都號沃野董自濡活耳數轉則立枯此蝸蚶治也命吏惣計一歲
中賦算幾何半儲內更半備外繇不意卽有徵發毋越章程未爲滇
式明年朝京北上公自辦嚴卻羨金不納留尹應天府尋以右副都
御史巡撫貴州貴患盜絀盜者鮮所平反公錄無左驗者數十餘人
出之家爲尸祝阿堂以攘印構兵有司持之急難作矣公言治方寸
符不足煩討請上方更印佩首置故印不問夷難遂戢容山酋韓甸
結諸峒作逆公檄土州兵授方畧亟討平之禽甸斬首二百餘級法
得敘廕或諗公爲門地計不則注名尺籍猶得論功公曰諸將平賊
吾子無汗馬勞何得任敘且冒功戮也誰敢哉終不自言直指代疏
策功循賞而已改南大理寺卿其冬遷戶部左侍郎明年冬拜南京
戶部尚書於時近侍坐袁州去位朝多曠官公起遠臣再歲超八座
人謂拙宦之效寔以退爲進云留都日頃兵變主計者頗難其人公
稽軍寔責通亡日夕講求其說出入簿書手自裁覈不數月倉庾流

衍儲峙以饒會病眴乞休 詔下優荅不允獻春稱篤吏部爲言本
官勤恪敷歷有年計曹方切倚重而病力亟辭諒非得已再疏報
可以隆慶二年戊辰正月二十九日卒於巖鎮里第 今上輟朝命
禮官爲文祭之有司給葬又明年十月十日葬鎮西十五里鳳山之
原封孺人汪氏祔子男四人梁檀槐朴將碑墓隧走使京師持所親
許翰檢國汪中丞道昆狀志請銘公仕當 肅皇帝勵精中年鼎台
相構人臣持風議者匪橋伊隨橋卽危身隨卽負國其難易可知公
守樸忠不弋灼灼名當機則發義形於色死生禍變倏興於前恬不
爲動曰有命焉公蓋辦之早矣人孰不欲子孫榮寵公誅數十年逋
寇默不自功假令纖芥弋時名取高位者能如是乎古稱賢將相謙
讓不伐公近之矣銘曰

赫赫鮑裔叔牙開系宜永昱恢著漢司隸昭以梁顯靚表晉宗尉
伸基歛厥緒未竭迨於公身振其儀羽備有武文爲時碩輔公初

登朝在 帝左右羣鷲刺天公不及雷出按軍正迹獮狼狐蠲逋
發貯民用大甦苗夷弄兵自于誅磔一戰奏功嘉馘二百公舍任
子不言所獲南都計相倚任方殷公歸五載奄以計聞 帝念勳
勤祭諭有文司空給葬守宰臨墳鳳山之原偕爾淑媛後百千禩
於昭 寵恩

賜進士及第光祿大夫柱國少師兼太子太師吏部尚書建極殿大
學士知

制誥

經筵

實錄

典誌總裁淮南李春芳拜撰

公字子實
諡文定

棠樾鮑氏三族宗譜卷之一百八十八

列女

鮑孝婦貞烈吳氏傳

周原誠

彥明石泉

孝婦姓吳氏名息歛衮繡鄉蜀源里鮑琪妻也年廿五事姑呂以孝謹聞至正十六年四月二十二日官軍克復郡治明日琪偕里父詣轅門請號或謂賊去未遠游卒必下鄉哨掠宜率老幼遠遯吳獨不去曰吾姑臥疾吾將安之乎雖死可也既而村墟寂無一人姑忽思羹啜吳即懷其嬰兒至村曠依苧薄採莧為具俄游卒至執之吳號曰吾姑方病俟吾歸作羹續命願貫我卒欲汚之不屈復大罵以走卒怒斬其首不殊蹴其屍入澗中吳猶抱其兒不置併浸死

周先生曰嗚呼世之亂離極矣人心天理消蝕盡矣三綱蕩然無所底矣吳也於斯能委身至危以事其姑犯身至險以致其養及卒不幸焉復潔其身以死死也復懷其子如生雖古烈丈夫精神

悍悍者不啻也吾茲傳焉蓋所以著人心之不死也其亦浩然於
天地者哉彼頑乎其無恥者可以奮矣嗚呼悲哉
元至正十六年十二月朔旦石泉周伯源撰

鮑節婦宋氏傳

唐文鳳

子儀
梧岡

節婦姓宋氏名禮玉歙北寧泰鄉人幼在室精女紅性敏而淳不尚
華靡事父母以孝謹聞年十有九始歸於鮑尚綱鮑爲儒宦宗家庭
肅睦凡婦入門必遵禮服勤節婦事舅姑以孝相夫以敬撫前室子
相以慈尚綱博學通今古名高一時洪武初郡守王公以賢良舉辭
不獲赴京師翰苑名流推轂授翰林院典籤尋除編修陞修撰蒞職
甫三載出爲耀州同知州當兵饑餘撫凋殘惠鰥寡民仰之如慈父
不幸未考滿而卒節婦年二十四抱其所生子長安扶旅櫬還鄉里
卒占萬狀於時遭家多事舅老而姑病怏怏觖望節婦棄脂澤躬儉
約經紀其家政不五年子長安亦天瑩瑩憂戚中益勵其志視相不

異已生母子二人相依爲命二三十年間扶顛持危卒底成立鄉邑
稱之先是所生子喪時其父憫節婦年少欲奪其志婦泣告曰曩吾
夫於耀州官廨月下謂吾曰設若罹咎汝肯守志乎婦具以實心對
夫喜曰汝若是吾無憾矣今夫不幸死是婦之不幸也豈可以死生
而異其心乎奉老恤孤以盡吾餘年庶無負於吾夫也父語塞而止
今年節婦年五十四郡邑以其事 聞遣察官覈實儀曹奉

勅大書貞節以旌表其門相於是有人以慰其母心矣復恐其善行無
以昭於遠也遂請予作傳予與尚綱篤斯文友誼乃爲書之以備史
之闕文焉

贊曰宋史孝義傳載鮑氏父子遇寇爭相爲死事以慈孝稱郡志
又載前元時江氏守節自誓詔旌表其門考其世則尚綱之五世
祖父及其從祖母也今宋婦又能勵志以踵江後可謂能繼美矣
嗚呼父之慈子之孝婦之貞何迭見於鮑氏之一門也豈非觀感

而興起歟然則鮑氏之父子二婦爲不可及已嗚呼賢哉

鮑節婦邱氏傳

鮑楠良用
龍山

節婦諱貞歛西巖寺鎮邱氏女也幼失恃能遵姆教服女事唯謹年二十歸爲棠樾鮑庭俊妻二年舉一子曰明童又踰年庭俊強死節婦痛憾哭擗不能自生諸娣姒羣從共相慰解之且曰夫之不幸不可爲矣幸有遺孤若卽死將不免於水火不如撫而全之久之意亦稍釋乃垢面毀容朝夕抱持其孤益勤績紡以爲家資歲時伏臘必有所祭祭必哀慟移日平居怡然娣姒間不見其戚戚也姑性嚴而多恚每輒詬適人雖節婦亦無所貸節婦受之亦不爲動容人益賢之明童少長慈教兼至甫弱冠爲娶方氏女旣而明童得軟脚疾節婦醫禱百計數年弗能瘳亦憂悶成疾每強至明童臥室慰安之曰毋以我爲慮也初治辛亥七月廿九日節婦卒年六十五明童病弗能興其季父庭茂爲治其喪鄉人憐之其族子楠敘而傳之

論曰予讀衛鄭詩醜乎其辭恠其人之無別者何若是之多也豈其性然哉抑亦有所習耳若節婦者固其生質之美得之於天而慈孝之裔閨門之範其所由來者遠矣雖遭其子之疾不獲上聞以歿而其貞自若也當是之時宗之少婦與節婦相繼失其所天而能以節自完者蓋燦然玉立非一二也嗚呼安得如椽之筆悉取而表章之以爲教化之一助哉

節婦方氏傳

鮑象賢復之
思菴

節婦姓方氏名庭歛沉塘玄公女適子族子紹潛初歸善修飭事翁姑執婦道甚虔處妯娌諸姑女和平樂易咸得其懽潛素弱不善治生客游和遂病卒節婦年將三十先有子女俱未育計聞慟不欲生念翁姑之在堂也勉成服奔喪自是毀容不出中閫凡里有慶會皆不赴強之謝曰此正賢輩時也予未亡人念不及此或勸之再適則曰有夫而早寡命也可辱身耶有富家子慕其賢厚賂翁翁許之強

節婦則泣而告曰翁雖有少子痴且病不能終養明甚盍留我以營後事耶必欲迫我行卽死不奉命翁懼爲止富家子候之三載百方游說不能奪乃別娶節婦見小叔之孱弱恐無以延先嗣謀於娣欲爲置側室焉事泥弗獲未幾翁叔相繼卒娣亦他行送終儀費咸出節婦姑素有心疾小失意輒大詬節婦事之委順亦允若尤善女工刺繡晝夜力作以自給族中女多就以爲師年五十三擇塚地於里東之山繚以磚垣中營一壙將爲合葬計予母太恭人偶見之問知其爲節婦也謂之曰汝今敢出不畏人奪耶則笑而謝曰予髮種種矣人安用此老婢爲太恭人慰藉之甚厚聞其風者咸忻慕焉

思菴子曰節婦之行二紀前聞之州太守東井者云若此蓋未嘗不三歎也予宗禮義相高聘多名門守節不二者代有其人何獨於節婦致意焉彼良人孔賢則懷其前亂續有人則望其後內外交持則畏其制積貯豐亨則戀其盛謂非人情與今咸無稱而能

毅然不撓此固堅貞之性出於天賦者然也世亦有夫死不嫁而挾制親屬支離門戶反爲夫之大玷雖以寡死又奚取焉節婦之安和周悉慎終如始使其生爲丈夫將不粹然君子哉年踰知命足以受旌而有司之舉多出有力之家若節婦者宜無聞也乃爲之傳以詔夫後之人

鮑景坡公元配王太君節烈傳

古世紳 敬存

繁邑節烈王孺人橫山橋鮑氏景坡公元配也公諱一軾粥粥若無能孺人同鄉士族女內政賢明是以先業日增會有明左兵入境肆標掠孺人見賊勢凶謂公曰事急矣偕逃行不疾倘俱遇害先靈不其餒而賊利金帛妾挾之逃賊必逐妾君與子庶幾可脫乎孺人乃攜子婦諸氏抱孫負籠奔長興埠置籠路側同子婦與孫溺溝瀆中子君泰不忍舍母以手援亦溺賊見籠持去公岐路乃脫越數日公歸馳覓三尸環抱浮水面倉皇就殮合葬於丁家凹之陽慘矣哉王

年三十五諸年方十七紳聞故老言之歷歷其會孫智周與紳連襟
袂因益知其先世之節烈如此噫嘻詎惟節烈哉實鮑氏之功臣也
倘非孺人舍生而以智脫公公必不免公不免禋祀不幾絕哉今觀
鮑氏之繩繩螫螫皆公續鸞膠之所遺也嗚呼伊誰之力歟太史公
曰死非難處死爲難孺人之處死善矣詩云旣明且哲以保其身孺
人明哲而不保其身其所保者大矣紳生也晚不能悉孺人銘椒賦
菊之遺芳卽其死難一事亦與尋常之節孝大異蓋有不可掩者今
當事纂修府乘自應採訪以增載籍光孺人之節烈留於萬古矣
乾隆丁丑贛榆縣教諭古世紳頓首拜撰

鮑烈婦羅氏小傳

烈婦姓羅氏歛呈坎別駕羅懋功孫女蜀源鮑鍾英妻也年十七嬪
於鮑事舅姑能盡孝道通書史大義英客廣陵羅嘗寓書於英曰君
無子獨不爲宗祀計耶英乃置媵宗氏於揚挈羅出與張姓賃屋而

居歲乙酉天兵南下所向風靡而揚州以史公可發搜城固守城
中危急英與張子某各走出逃死不可得移時張大呼叱咤金鐵傷
被體而歸羅驚泣諭宗氏曰兵旋至誠須臾緩死將恐夫欲求死而
不可得死也遂偕張某妻各攜片練經於中堂逮英啓扉入則已雙
懸於梁間矣蓋守身不辱視死如歸可謂能通大義矣兵破揚城英
亦及難兩淮鹽法道梁公

諱知先

題表揚貞烈以旌

鮑安人傳

吳瞻淇

衛漪

鮑安人程氏者鮑司馬雪崖公之配而文學周士之母也系出晉太
守元譚公後父處士惟嘉公以文行著爲新安耆宿家於歙之虹梁
夜夢一鶴迴翔於庭中而生安人安人幼卽知承父訓喜讀書能通
大義性貞靜不苟言笑八九歲時知賦詩處士絕憐之曰若爲男當
大吾宗女也其成孝婦乎年十九歸於鮑甫入門卽能佐雪崖公事
其舅贈司馬以忠公及姑桂太安人和色柔聲視寒燠疾苦唯謹贈

公及太安人安之偶不在側輒不怡居無何家漸中落雪崖公畊硯田於遠常不給安人則勤紡績脫簪珥以奉堂上歡不使雪崖公有內顧憂贈公喜謂太安人曰吾婦孝不殊我兒在側也安人居恆素謙和遇里黨婦人無貴賤必勉以修婦職時有無禮於舅姑者安人則義形於色直斥其非復委婉諭之卒不悛安人怒遂絕不復與通里黨咸謂安人能自孝又能以孝勗人也康熙甲寅三藩叛閩寇入新安殘殺焚掠無完室雪崖公兄弟方隨父客武林不及歸安人獨奉太安人逃避塗遇賊劫之安人泣告曰吾姑也幸勿殺殺我可也因以身蔽姑擬以刃不顧賊感其孝縱之去當是時家益落安人益晝夜勤女紅流離遷徙困頓不可狀而子周士適生安人體素羸強起自乳子羸益甚遂病未幾贈公歿與雪崖公擗踊治喪事無巨細必盡禮病益不支然猶自諱日力疾起持家事奉太安人晨昏怡怡如平時將卒之夕乃執雪崖公手而流涕嗚咽謂曰自妾爲君家婦

實欲始終修婦職以佐君侍吾姑也今不幸將死矣復欲與君奉滄瀛承顏膝下尚可得乎姑獨居將奈何雪崖公亦悲不自勝相對欷歔久之目雪崖公曰善視吾姑泪涔涔下而卒初安人之病亟也太安人夢一鶴止於屋之北角哀鳴久之忽冲霄而去太安人覺而悟告家人曰噫天其奪我孝婦乎余將疇依乎且語且泣不數日安人遂逝後二十餘年雪崖公以太學生就試吏部授州司馬之職請恩綸得贈安人而子周士亦以文藝受知於督學使者山右魏公補博士弟子員每向人道其母軼事輒流泪不止人皆知天之報施安人者正未艾云

論曰安人之孝父許之舅姑稱之族黨傳頌之言不間親疎矣然余聞安人歿時嗣君甫六歲撫之而哭曰吾之孕汝也嘗遵古訓坐立必正襁褓時一言一動不納汝於邪汝志之無忘我死不恨矣嗚呼豈惟成孝婦雖古之賢母又曷以加焉

翰林院庶吉士同邑吳瞻淇撰

鮑烈婦徐氏傳

吳聖楫

右舟
雪巖

婦徐氏女歛之北郭人西蓮先生之姪女孫也婦于鮑爲蜀源鮑烈婦云婦父成憲母程氏婦生寡言笑人咸以痴目之鮑名觀澳亦農家子賈客外婦獨養姑非寧歸不越閭也里俗信星家言謂鮑命當短婦聞之曰是言苟驗驗則我從之矣無何鮑竟以暴疾卒姑蘇計至之日婦自樓聞戶外有哭聲則祖姑氏自外來也婦曰某來胡哭語其姑曰此必吾夫凶問至矣已而果然婦擗踊不欲生碎首觸地其姑寬解之時婦夫王母春秋高尚在堂亦來勸婦無死婦數絕數蘇戶內之人又復環守之自己達酉婦退亦退婦進亦進婦乃從容投淚若遜若謝示休息狀旁觀者因相謂曰死者天命不可復生若無自苦姑與王姑啖以糜粥婦斂容起受若令其姑知婦更無死意也守者於是亦相與語其姑曰婦可以不死矣因稍懈時既昏家人

趣婦登樓姑仍令一婢守其戶婦誑其婢曰若爲我置火婢固不往婦佯怒謂之夜甚寒我以諸姑慰我故而不死乃死寒耶婢不得已出戶取火婦竟以棕繩繫頸數匝經於梁婢來而婦氣已絕矣歛之日色猶生卒年二十有二適于鮑僅六載未有子徐西蓮先生曰子家故貧而有此姪女孫淑婉貞靚明大義慷慨殉其夫以死人固有一死如此者亦可謂重於泰山矣

贊曰古有以愚成其忠者矣婦且以痴成其烈痴耶烈耶此所謂死而無死者也嗚呼鮑氏婦數死而不得死乃竟死又反得不死死亦何負於人哉

順治二年乙酉春二月既望北山農吳聖楫拜撰

慈孝洪孺人家傳

鄭牧 用牧

景熙先生繼室洪孺人洪源東燧公次女年二十一歸景熙景熙先娶于程有子女各一人甫數歲嘗善病病至不可摸索牀褥上下燥

濕推就孺人顧左則失右顧右則失左而是時祖姑方太夫人及翁璞齋公姑胡夫人俱在堂內外事毛髮以上動輒關孺人於是爲景熙娶副室日抱其子衡之竊竊與景熙言曰吾已有子矣景熙父璞齋公璞齋公自以其鮑氏來新安譜系至前明天順間始一修此後將三百年欲續爲一編以示子孫草創未就卽世景熙乃意承考焉搜羅補緝一時親族友朋紛至迭來酒食餽遺叱嗟立辦景熙家無餘財而僮磊落絕不問所自來將十有餘年至是孺人歿攜其子衡之檢奩中物無一存者所存惟質錢之帖多如束筍而已遂痛哭流涕與子衡之言曰吾負汝繼母矣衡之亦椎膺仆地曰直母耳何繼也一家子婦內人皆行哭失聲孺人死年四十有八卒未嘗自生有子也

鄭子曰子觀鮑衡之所述其繼母洪孺人行事以爲事繼母如母禮也然非其母之視前所出子如己子又何以得此於其子哉至若斥奩中物以爲翁尊祖收族之資世乃有以陰之道爲吝嗇者何哉事固有大謬不然者也

